

摘藻堂四庫全書薈要

史部

欽定四庫全書薈要卷六千五百十二

史部

元史卷一百三十三

明翰林學士亞中大夫知制誥兼修國史宋濂等修

列傳第二十

達春

達春蒙古扎拉爾氏父扎拉台厯事太祖憲宗歲甲寅奉旨伐高麗命桑古呼喇珠諸王並聽節制其年破高麗連城舉國遁入海島己未正月高麗計窮遂內附扎

拉台之功居多達春以勲臣子至元十七年授昭勇大將軍東京路總管府達魯噶齊十八年召見賜鈔六十錠旌其廉勤陞昭毅大將軍開元等路宣慰使改遼東宣慰使二十二年入覲帝慰勞久之且問曰太祖命爾父扎拉台聖旨爾能記否達春應對周旋不逾禮節帝嘉之賜以玉帶弓矢拜龍虎衛上將軍東京等路行中書省右丞復授遼東道宣慰使達春探知納延謀叛遣人馳驛上聞命領軍一萬與皇子阿雅噶齊同力備禦

女直碩達勒達官民與納延連結達春遂棄妻子與麾下十二騎直抵建州距咸平千五百里與納延黨岱遜巴圖爾等合戰兩中流矢繼知其黨特爾格綽爾齊等欲襲皇子阿雅噶齊以數十人退戰千餘人扈皇子渡遼納延軍來襲達春轉鬪而前射其酋特古斯台中口鏃出于項墮馬死追兵乃退遂軍懿州州老幼千餘人焚香羅拜道傍泣曰非宣慰公吾屬無遺種矣達春曰今日之事上賴皇帝洪福下賴將士之力吾何功焉至

遼西羅山北小龍泊得叛酋史托里台盧全等納款書
期而不至達春即遣將討擒之又獲其黨王色克復與
齊達勒大王等戰破之將士欲俘掠達春悉禁止與僉
院罕扎監司托克托台追納延餘黨北至金山戰捷帝
嘉其功召賜黃金珠璣錦衣弓矢鞍勒二十八年賜明
珠虎符充蒙古軍萬戶是歲復領軍討哈坦于女直還
攻建州逐阿哈投江死明年哈坦涉海南襲高麗達春
復進兵討之入朝世祖嘉其功眷遇彌渥復賜珍珠上

服拜榮祿大夫遼陽等處行中書省平章政事兼蒙古
軍萬戶卒于位子達蘭特穆爾中奉大夫遼陽省參知
政事

巴延

巴延河西人父胡土克圖以質子從太祖征河西太祖
立質子軍號圖魯格遂以胡土克圖為百戶太宗朝都
元帥耨埒承制以為千戶從征西川呼圖克叛于臨洮
世祖命胡土克圖等以蒙古漢軍從大軍討之胡土克

圖卒巴延襲至元九年制授征行千戶佩金符十年宋師侵成都四川僉省嚴忠範遣巴延迎擊大敗之又從行省伊蘇岱爾攻嘉定從行院呼敦取瀘敘攻重慶數有戰功十二年行院承制以為東西兩川蒙古漢軍萬戶總帥汪良臣用兵忠州命巴延將兵二千往涪州策應之宋人伺知良臣回以舟師順流而下邀于清江巴延引兵馳赴擒其部將李春等十七人取其軍資焚其戰艦十三年瀘州復叛行院遣巴延領兵趨瀘之珍珠

堡敗其將王世昌俘掠其民人孳畜移兵戍暗溪砦宋
合州兵來援巴延生擒百餘人戮之遂克瀘州行院副
使布哈進兵圍重慶遣巴延將兵游擊獲大良平李立
所遣謀者四人重慶降制授宣武將軍蒙古漢軍總管
十九年從總帥汪良臣入見陞懷遠大將軍管軍萬戶
改賜金虎符卒子塔齊爾嗣授明威將軍興元金州萬
戶府達魯噶齊

伊克德濟

伊克德濟實喇婁人祖實達爾摩哩以烏蘇展國哈喇
婁軍三千來歸於太祖又獻羊牛馬以萬計以千戶從
征回回諸國又從睿宗及徹伯爾降河西諸城後從攻
臨洮死焉父密喇卜和卓從太宗滅金又從憲宗攻蜀
為萬戶府達嚕噶齊歿于軍中統二年伊克德濟為千
戶數有戰功下五花石城白馬等砦至元七年宋兵入
成都伊克德濟以兵四百人與之相拒四日宋兵退追
擊于眉州大破之授蒙古實喇婁河西漢軍萬戶戍眉

州從圍嘉定築懷遠砦以守其要害宋兵出戰輒敗十二年入朝賜對衣玉束帶白金百兩加昭遠大將軍上萬戶益兵萬人會圍重慶盡督馬湖江兩岸水陸軍馬十四年從圍瀘州攻神臂門先登拔之從行樞密副使布哈攻重慶屯佛圖關屢戰有功移屯堡子頭宋守將趙安開門降重慶既平復將其衆畧地思州得降將百餘人加昭毅大將軍帝以西川新附選能鎮撫之者授嘉定軍民西川諸蠻夷部宣撫司達魯噶齊增戶萬餘

進奉國上將軍四川宣慰使都元帥十七年征鄂端拜雲南行省參知政事二十一年與右丞台布諸王桑阿克達爾分道征緬造舟阿昔阿禾兩江得二百艘進攻江頭城拔之獲其銳卒萬人命都元帥袁世安守之且圖其地形勢遣使詣闕具陳所以攻守之方先是既破江頭城遣哈迪爾楊林等諭緬使降不報而諸叛蠻據建都大公城以拒大軍復遣僧諭以禍福反為所害遂督其軍水陸並進擊破之建都金齒等十二城皆降命

都元都哈達萬戶布都瑪勒等以兵五千戍之二十八
年改四川行樞密副使卒子二人和尼齊德濟雲南都
元帥額埒蘇襲蒙古軍萬戶

額森鼐爾

額森鼐爾輝和爾人父都沁哈雅以才武從太祖太宗
平金夏有功額森鼐爾事世祖于潛藩從征土番雲南
常為前驅歲己未伐宋至鄂州先登奪其外城中統元
年從征額呼布格與其黨遇大呼馳擊之其衆駭潰賞

白金貂裘明年討李璫以功賞白金五百兩授西道都
元帥金虎符土番宣慰使額森鼐爾素熟夷情相地設
屯鎮撫之恩威兼著頑獷皆悅服賜金幣鈔及玉束帶
為宣慰使歷二十四年遷雲南行省平章政事尋改江
西行省平章政事巨盜鍾明亭為害額森鼐爾討擒之
至元三十一年成宗即位召還賜玉帶改陝西行省平
章政事謝事歸隴右十年卒贈協恭保節功臣太保儀
同三司上柱國鞏國公諡敏忠子諤勒哲太子詹事進

金紫光祿大夫中書平章政事

托里實克

托里實克輝和爾人祖巴爾斯呼圖克托噶阿古齊國
初領輝和爾阿哩袞茂齊哩克巴爾斯四部以兵從攻
四川歿于軍父特爾格齊托噶阿古齊憲宗命長哈瑪
爾及察遜諸宗藩地琿塔哈阿勒達爾叛執特爾格齊
械繫之特爾格齊脫走入覲世祖賜金符襲父職命率
所部兵就征之以功受賜又命從諸王鄂囉齊討建都

平之陞昭勇大將軍羅羅斯副都元帥同知宣慰司事
至西番境番酋巴喇沁遮道不得進特爾於齊戰却之
道遂通事聞賜金虎符賞白金及衣二襲卒于官托里
實克襲職為武德將軍羅羅斯副都元帥同知宣慰司事其
所部有產金戶叛服不常托里實克往討平之定昌路
總管古納叛與其千戶阿夷謀率衆渡不思魯河托里
實克引兵戰擒阿夷殺之德平路落來民又叛托里實
克又討平之亦奚不薛地未附民多立寨依險自保詔

雲南行省調羅羅斯蒙古軍四百人羅羅章六百人屬
托里實克從左丞愛魯克討之托里實克先至拔其寨
愛魯克命率兵攻羅羽抵落穿奪其關獲馬牛羊給士
卒又與萬戶鄂都瑪勒攻怯兒地其酋長阿失據山寨
上托里實克先登破之愛魯克命托里實克總左手四
翼兵討平亦奚不薛又有蠻子童者立寨于納土原山
行省復命托里實克以蒙古纍焚軍與行省參政阿哈
巴克實攻之子童窮威降進兼管軍副萬戶蠻細狗折

興等及威龍州判官阿遮皆憑險為亂托里實克夜入據其寨賊散走遣兵搜山谷獲阿遮于深菁斬之籍其民五百餘戶為農托里實克入覲授三珠虎符加懷遠大將軍羅羅斯宣慰使兼管軍萬戶既還治括戶口立賦稅以給屯戍昌州蘇你巴翠等作亂托里實克以雲南王命討降之徙其衆于昌州平川鎮守千戶任世祿以所部二千人乘間遁去屯威龍州托里實克先據其要路阨之世祿降未幾入覲卒于京師子索諾木巴勒

由宿衛襲職佩三珠金虎符官至鎮國上將軍

丹珠爾

丹珠爾蒙古達勒達岱人至元七年從征蜀敗宋兵馬
湖江斬首百餘級九年從征建都蠻十一年從攻嘉定
敗宋兵於夾江又從攻下瀘敘諸州進圍重慶敗宋將
張萬瀘州叛諸軍將攻瀘丹珠爾先將其衆據紅米灣
與宋兵戰敗之進至安樂山復敗宋軍斬首五百餘級
獲戰艦四宋兵邀漕舟於安樂山擊走之遂破其石磐

寨十四年春抵瀘州奪其戰艦五艘還至安樂山復與宋兵戰殺數十人從諸軍拔瀘州張萬舉兵欲向合州丹珠爾以銳卒千人邀擊於龍坎斬首百餘級萬引却賜銀符授管軍千戶從征鄂端至甘州賜金符陞總管十九年從諸王赫伯元帥孟古代軍至鄂端與叛王約羅等戰勝之二十年諸王巴拜叛以兵來攻丹珠爾獨破其五百餘衆拔亡卒二千餘人以出進副萬戶還戍長寧軍宋好止寨以兵來襲丹珠爾擊走之斬首百餘

級生獲三十餘人二十六年賜金虎符授信武將軍平陽等路萬戶府達魯噶齊卒子濟延圖布哈襲

托歡

托歡扎拉爾台氏祖矩珠爾父托多為萬戶從皇子庫春呼圖克圖畧汴宋睢宿等州歲癸丑鎮蔡州托多卒子布哈襲布哈卒弟阿勒特爾襲阿勒達爾卒弟長壽襲並為千戶守蔡長壽卒托歡襲加武畧將軍佩金符從丞相阿珠攻陽邏堡累有戰功渡江攻鄂漢諸州下

之會宋軍于丁家洲托歡突入奪戰艦數艘攻建康太
平等郡下之宋都統姜才攻楊子橋堡托歡率精兵出
堡東逆之斬殺幾盡俄而宋軍復集堡北遂奮擊走追
至揚州殺傷甚衆會萬戶實喇罕入朝道滁州為宋兵
所遮擊敗宋兵出實喇罕從攻揚州至泥湖遇宋軍奪
三十餘艘遂進兵蘇州與宋軍戰擒柳奉使至元十三
年右丞相遣托歡援高郵軍未至二十里會宋將率兵
來漕高郵粟與戰擒之有頃宋高郵都統復率二萬人

至擊敗之十四年春授懷遠大將軍太平路總管府達
魯噶齊會珠爾哈岱寇北邊帝命托歡往討之戰左臂
中流矢二帝慰勞之賜鎧甲弓矢鞍勒鈔千五百緡十
五年春從親王烏爾古岱丞相博囉西征有功加定遠
大將軍福州路總管府達魯噶齊平閩盜改武昌卒

錫里巴

錫里巴蒙古人祖齊呼勒圖從太祖經畧西夏有功又
隸諸王卓沁台領博囉齊與金人戰歿于陣父瑪拉噶

嗣從征阿勒達爾亦有功世祖賜以白金五十兩錫里巴世其職由樞密院斷事官為河南行中書省斷事官至元七年佩金虎符引水軍四萬攻襄陽八年七月宋將范文虎來援錫里巴敗其軍進圍樊城先登戰于鹿門與諸軍擒其將張貴十年遷昭勇大將軍為耽羅國招討使奉旨入見上都改管軍萬戶領襄陽諸路新軍從丞相巴延等渡江破獨松關下長興取湖州行安撫司事十四年授湖州總管進鎮國上將軍淮西道宣慰

使十八年卒子達喇齊曲靖等路宣慰使

布呼齊

布呼齊鴻吉哩氏世居應昌祖孟克以后族備太祖宿衛父婁實克狀貌魁偉有謀善射太宗嘗問以軍旅之事應對稱旨即命為千戶尋以為齊王府司馬後從睿宗伐金有功詔還宿衛以疾卒布呼齊英邁有父風幼孤能自刻厲如成人暇日習弓馬夜則讀書其母嘗訓之曰汝父忠勇絕人天不假年汝能自立則汝父歿無

憾矣布呼齊由是感激期以成父之志從軍有功襲父官為齊王司馬世祖親征納延以齊王兵從兵始交布呼齊躍馬陷陳斬其旗所嚮披靡世祖遙望見壯之有頃納延兵遁走布呼齊馳歸以捷聞世祖大悅勞之曰無忝爾父矣賜黃金五十兩金織文二疋授宣威將軍信州路達嚕噶齊時江南初附布宣上意與民更始期年郡中大治部使者以聞帝獎嘆久之即遣使賜以上尊俄以疾卒年三十三贈河間路達嚕噶齊追封范陽

郡侯子托音布哈歷監察御史河南廉訪副使郴州路達魯噶齊

齊喇

齊喇西域人世居太原由中書譯史從平章政事賽音
諤德齊經畧川陝至元十二年立雲南行省署為幕官
諸洞酋長款附齊喇功居多十五年分省大理會緬人
入寇齊喇以戰具資軍士討平之授行中書省左右司
員外郎十八年平章尼雅斯拉鼎遣詣闕奏邊事世祖

愛其聰辨練達賜虎符拜鎮西平緬麓川等路宣撫司
達魯噶齊兼管軍招討使成都烏蒙諸驛阻絕齊喇市
馬給傳往來便之俄被召上京問以征緬事宜奏對稱
旨賜幣帛及翎根甲諸王桑阿克達爾右丞台布征緬
齊喇率兵船為鄉導拔其江頭城振旅而還復從雲南
王入緬總兵三千屯鎮驃國設方畧招徠其黨由是復
業者衆後入覲世祖慰勞之詢以緬國始末擢正議大
夫僉緬中行中書省事佩金符頒詔於緬宣布威德緬

王稽顙稱謝遣世子信合八的入貢遷通奉大夫雲南
諸路行中書省參知政事進資善大夫雲南諸路行中
書省左丞大德四年以疾卒

安巴

安巴唐古人祖森濟圖迎太祖于布琳塔爾哈納之地
太祖嘉其效順命為圖爾哈筆且齊兼克呼穆爾齊父
圖魯齊襲職事憲宗官至文州禮店元帥府達魯噶齊
安巴弱冠入宿衛性嚴重剛果有大志嘗親迎于燉煌

阻兵不得歸乃客居于闐宗王阿勒呼木之所世祖遣色徹肯等使阿勒呼木以通好阿勒呼木留使者數年弗遣安巴悉以已馬駝驢之令逃去色徹肯等脫歸具以白世祖世祖稱嘆久之既而命元帥布哈特穆爾等征于闐安巴乘間至行營見色徹肯於帳中色徹肯曰公之忠義已上聞矣布哈特穆爾遂承制命安巴權充樞密院客省使俄有旨護送安巴妻子來京師未幾宗王納延叛世祖親征安巴在行間屢捷命為克爾叟布

爾噶博勒卓等處萬戶又諸王哈魯駙馬圖們岱爾等
叛安巴率所部兵戰于克爾叟實保圖之地身中七創
所乘馬亦中二矢自旦至晡鏖戰愈力刺圖們岱爾殺
之生擒哈魯以獻世祖嘉其功命長唐古衛兼僉樞密
院事凡分立諸色五衛軍職襲替屯戍之法多所更定
厯同僉副樞同知至知樞密院事以疾終于位贈推忠
保節功臣資善大夫甘肅等處行中書省右丞上護軍
寧夏郡公諡忠遂子阿齊拉知樞密院事琳沁巴勒湖

廣省左丞

伊蘇岱爾

伊蘇岱爾喀喇人父阿勒巴巴雅濟呼太祖時率衆來歸以五十戶從軍南征力戰死伊蘇岱爾世其官從丞相巴延經畧襄樊攻百丈山鶴子灘功居最及襄樊圍合即被甲先登賞銀鈔百兩明年破復州殺其將以功陞百戶主帥言賞不足酬其勞世祖賜金符加為千戶督五路招討至元十六年改金虎符管軍總管江南平

錄功進懷遠大將軍管軍萬戶領江淮戰艦數百艘東
征日本全軍而還有旨特賜養老一百戶衣服弓矢鞍
轡有加二十二年移鎮泰州時籍民丁為兵得萬人以
伊蘇岱爾為欽察親軍指揮使統之大德三年以疾卒
子七人曰嘉琿達曰哈斯襲父職以疾卒曰赫德牧馬
同知曰延壽襲兄職曰巴延領哈喇齊曰諤勒哲特穆
爾廣德路萬戶達魯噶齊曰哈喇章

實都爾

實都爾欽察氏父托蘇隸蒙古軍籍中統二年從丞相
巴延討李璫叛以功授百戶至元十年告老以實都爾
代之十一年實都爾從大軍南征攻取襄陽唐鄧申裕
鈞許等州累功授忠顯校尉管軍總把賜銀符將其父
軍十四年從諸王拜穆爾追擊珠爾噶岱雅布薩爾等
於黑城哈喇和琳之地平之十七年賜金符陞武畧將
軍侍衛軍百戶時亡宋猶有未附城邑實都爾言于省
願自舉兵下之省從其請諸城聞風而附二十四年賜

虎符進宣武將軍漢洞右江萬戶府達嚕噶齊是年秋
七月領洞軍從鎮南王征交趾冬十月至境駐兵萬劫
右丞阿巴齊命進兵拔其一字城射交人奪其戰艦七
明年春正月大兵進逼偽興道王居與交人戰于塔兒
山奮戈撞擊之右臂中毒矢流血盈掬灑血奮戰射死
交人二十餘仍督諸軍乘勝繼進大敗之遂入其都城
四月戰于韓村堡擒其將黃澤是夜二鼓交人突至謀
劫營官軍堅壁以待敵失計詰旦鳴鼓出營交人却追

殺甚衆還營立木柵增邏卒交人不敢犯五月鎮南王
引兵還以實都爾為前軍行次陷泥關戰數十合交人
却遂還迎鎮南王于女兒關交人四萬餘截其要道時
我軍乏且疲于戰將佐相顧失色實都爾率勇士奮戈
衝擊之交人却二十餘里遂得全師而還鎮南王閱其
勞命樞密臣奏陞其秩二十六年賜虎符授廣威將軍
砲手軍匠萬戶府達嚕噶齊大德二年卒子額森特穆
爾襲

元史卷一百三十三

元史卷一百三十三考證

達春傳總帥汪良臣用兵忠州 按良臣原本亦誤田

哥今併改

伊克德濟傳至元二十一年與右丞台布諸王桑阿克
達爾分道征緬 按經世大典及緬本傳俱作二十
年與此異

伊克德濟傳命都元帥袁世安守之 按袁字原本訛
來考經世大典元史類編俱作袁似為可據緬本傳

又訛作元世安則以音近而誤今據經世大典改

丹珠爾傳 按丹珠爾傳之前托里賓克傳後舊列呼

喇珠重喜二傳考一百二十三卷內呼喇珠之祖齊

都爾重喜之祖塔本哲爾傳俱已全載此為複出今

刪

錫里巴傳 按錫里巴傳之前托歡傳後舊複載鄂勒

哲圖傳與一百三十一卷重蓋誤以一人作兩傳今

刪

齊喇傳拜鎮西平緬麓川等路宣撫司 按舊本脫平

字今據百官志增

齊喇傳緬王遣世子信合八的入貢 按經世大典作

信加八的與此異

實都爾傳中統二年從丞相巴延討李璫叛 按本紀

李璫之叛實在三年

實都爾傳右丞阿巴齊命進兵拔一字城 按右丞舊

訛左丞阿巴齊原文阿八赤此處又訛阿八今據阿

巴齊本傳改



總校官編修臣吳紹濬

欽定四庫全書薈要

史部
元史卷一百三十四至

詳校官編修臣王天祿



欽定四庫全書薈要卷六千五百十三 史部

元史卷一百三十四

明翰林學士亞中大夫知制誥兼修國史宋濂等修

列傳第二十一

薩奇蘇

薩奇蘇回鶻人其國阿塔都督托果斯之次子也初為太祖弟烏珍筆且齊領王傳烏珍薨長子齊伯格蚤世嫡孫塔齊爾幼庶兄托迪狂恣欲廢嫡自立薩奇蘇與

和爾果斯馳白皇后乃授塔齊爾以皇太弟寶襲爵為
王薩奇蘇以功與和爾果斯分治黑山以南薩奇蘇理
之其北和爾果斯理之從憲宗攻釣魚山建言乘勢定
江南帝嘉納焉憲宗崩額呼布格爭立諸王多附之者
薩奇蘇馳見塔齊爾力言宜協心推戴世祖塔齊爾從
之及世祖即位聞薩奇蘇所言授北京宣撫賜宮人昂
吉爾氏及金帛章服及至鎮鋤奸抑彊遼東以寧會高
麗有異志帝遣使究治則委罪于其臣洪察呼械送京

師道遼東薩奇蘇訪知洪察呼以直諫忤意即奏疏為
直其事帝命釋之李璫叛命薩奇蘇帥師從宗王哈必
齊討之李璫伏誅哈必齊欲屠城薩奇蘇力爭曰王者
之師誅止元惡脅從罔治因撫摩其人衆情大悅授山
東行省都督遷經畧統軍二使兼益都路達魯噶齊辭
不拜上言山東重鎮宜選貴戚臨之帝不許賜京城宅
一區益都田千頃及璫馬羣園林水磴海青銀鼠裘之
屬兵後民乏牛具為之上聞驗民丁力官給之統軍超

布哈田遊無度害稼病民元帥伊蘇岱爾據民田為牧地薩奇蘇隨事表聞有旨杖超布哈一百令伊蘇岱爾還其田壇故將毛璋欲率諸部謀執薩奇蘇以歸宋璋黨上變乃襲璋斬之薩奇蘇嘗慕古人舉親舉讐之義叛帥故卒得與子姓參用公論多之山東歲屢歉為請于朝發粟賑卹又奏蠲其田租山東人刻石頌德卒年六十六後贈安邊經遠宣惠功臣謚襄惠

額訥格爾

額訥格爾字正卿其先屬永古特部徙臨洮之狄道金
畧地盡室遷遼東曾祖特穆爾英格仕金為馬步軍指
揮使官名有馬因以馬為氏祖博索瑪伊爾徙靜州之
天山以財雄邊宣宗遷汴父實喇濟蘇辟尚書省譯史
試開封判官改鳳翔府兵馬判官死國事贈輔國上將
軍恒州刺史廟號褒忠額訥格爾好學負氣父死時年
十七奮然投冠于地曰吾父死國難吾獨不能紓家難
乎會國兵破汴侍母北行間闕鋒鏑中北見憲宗辭容

端謹帝嘉賞命贊布扎爾斷事官事以燕故城為治所
額訥格爾慨然以治道自任政事修舉歲壬子料民丁
于中原凡業儒者試通一經即不同編戶著為令甲儒
人免丁者額訥格爾始之也性好施予嘗建言立常平
倉舉海內賢士楊春卿張孝純輩分布諸郡號稱得人
又羅致名士敬鼎臣授業館下薦引馬文玉牛應之輩
為參佐後皆位至卿相歲己未世祖以親王南征從行
至汴令專饋饟運濟南鹽百萬斤以給公私之費所過

州郡汴蔡汝潁之間商農安業軍政修舉額訥格爾有
力焉及即位降詔褒獎世祖將親征額呼布格額訥格
爾出私財市馬五百助軍帝厚贍其家曰當償汝也拜
禮部尚書佩金虎符四年南邊不靖額訥格爾言光潁
等處立椎場歲可得鐵一百三萬七千餘斤鑄農器二
十萬事用易粟四萬石輸官不惟官民兩便因可以鎮
服南方詔以本職兼領已括戶三千興煽鐵冶蒙古漢
軍並聽節制未行以疾卒年四十八贈推忠宣力翊運

功臣正議大夫僉書樞密院事上輕車都尉梁郡侯謚
忠懿子孫登仕籍者甚衆至仁宗朝詔行科舉曾孫祖
常博學能文章鄉試會試皆為舉首由翰林應奉拜監
察御史直言忤上官意去居浮光數年起為翰林待制
畢遷御史中丞卒謚文貞

實保

實保輝和爾人父奇凌貝鄂齊爾身長八尺智勇過人
太祖北征領兵來歸從征回回國數立功將重賞之自

請為本國古魯城達魯噶齊從之仍賜種田戶二百卒
實保事世祖潛邸命長筆且齊中統元年以為真定路
達魯噶齊改戶部尚書宗正府扎爾古齊額呼布格之
叛帝命實保詣河西督糧運給軍還至西京北聞萬戶
阿實克特穆爾等方選士卒將從額呼布格實保矯制
召其軍赴行在阿實克特穆爾疑未決實保委曲諭之
曰皇帝兄也額呼布格弟也從兄順事也又何疑焉阿
實克特穆爾等請夜議之期翌日復命且以兵圍實保

以待明日皆至曰從爾之言矣即便宜以西京錢糧給其軍遂率之以行入見帝嘆曰戰陣之間得一夫之助猶為有濟實保以二萬軍至其功豈少哉海都叛世祖大閱兵將討之先命實保使海都使之罷兵置驛來朝實保至海都傳旨諭之海都聽命既退軍置驛而丞相安圖軍先已克和爾和大王部曲盡獲其輜重海都懼將逃謂實保曰我不難殺汝念我父嘗受書於汝姑遣汝歸以安圖之事聞非我罪也實保以聞帝曰汝言是

也先是來者亦嘗有此言尋命為中書右丞商議政事
妻以宗王之女博囉章公主明年復使海都諭之來歸
且曰苟不從我爾能敵諸王蕃衛之兵乎海都辭以畏
死不敢實保奉使奔走三年風沙翳目時年已七十矣
命為翰林承旨給全俸養老年八十九卒子烏魯斯哈
美至元二十三年授浙東宣慰使浙東盜起偽鑄印璽
僭稱天降大王烏魯斯哈美平之移鎮廣西峒蠻羅天
佑作亂招諭降之年六十九卒子耀珠至大三年授典

用監卿有盜竊世祖御帶者懸賞五千錠以購賊耀珠擒獲之盜伏誅耀珠辭賞武宗嘉其不伐予之千錠官至榮祿大夫宗正府扎爾古齊

特里

特里奈曼人也居絳州祖拜布哈為宗王巴圖王傳特里魁偉寡言有謀畧早歲宿衛王府巴圖分地平陽以特里監隰州中統初調平陽馬步站達嚕噶齊至元初宗王海都叛廷議欲伐之世祖曰朕以宗室之情惟當

懷之以德其擇謹密足任大事者往使焉左右以特里對遂召見語及大事特里應對稱旨帝嘉其辯慧曰此事非汝不可然必先詣巴圖蒙克特穆爾王所相與計而後行使二人副之特里既奉命欲直造海都境視其虛實然後議于諸王副者弗從曰上命我輩先議于王今遽造敵境不可特里曰親承密旨汝輩違則當誅副者懼而從之行既至海都日召宗親宴飲將伺其隙謀害之特里乃厲聲斥之曰且食勿語望語言脫口相撫

為罪耶良久海都曰直哉酒半特里求衣為歡海都嘉其雄辯將解與之其妃止之以皮服二襲付之因語其屬曰為使者當如是矣厚贈以行至巴圖蒙克特穆爾王所具告以故王曰祖宗有訓叛者人得誅之如通好不從奉師以行天罰我即外應掩襲勦絕不難矣特里還悉以事聞因言於帝曰海都兵繁而銳不宜速戰來則堅壘待之去則勿追自守既固則無虞矣帝深然之勅所受海都皮服全飾以金凡朝會宜服以表示焉其

賞賜不可勝計後屢使巴圖王所道遇海都游兵副者
前行失對遇害特里後至曰我為天子使可以非禮犯
之耶游兵語屈乃曰前者偽使此真使也釋之遂獨得
還帝嘗謂侍臣曰有特里則朕之宗族將不失和矣海
都覘伺巴圖王為備已嚴意乃帖然特里始終凡四往
返歷十四年帝謂特里曰在朝官之要重者惟汝所擇
對曰臣志在王室其事未辦不敢奉命令臣母在絳州
老且病得侍朝夕幸也詔從其請授絳州達魯噶齊至

卷一百三十四
元十五年平陽李二謀亂特里捕問盡得其狀中書奏
進其秩帝曰特里豈惟能辦此耶加宣武將軍至元十
八年病卒於官年六十四子達蘭台嗣官信武將軍同
知大同路總管府事

阿錫頁

阿錫頁西域佛琳人通西域諸部語工星厯醫藥事定
宗直言敢諫時世祖在藩邸器之中統四年命掌西域
星厯醫藥二司事後改廣惠司仍命領之世祖嘗詔都

城大作佛事集教坊妓樂儀仗以迎導阿錫頁奏曰高麗新附山東初定江南未下天下疲弊此無益之費甚無謂也帝嘉納之至元五年從獵保定日且久乃從容于帝前語供給之民曰得無妨爾耕乎帝為罷獵至元十三年丞相巴延平江南還姦臣以飛語讒之阿錫頁叩頭諫得解尋奉詔使西北宗王鄂勒歡所還拜平章政事固辭擢祕書監領宗福使遷翰林學士承旨兼修國史大德元年授平章政事八年京師地震上弗豫中

官名問災異殆下民所致耶對曰天地示警民何與焉
成宗崩內旨索星厯祕文阿錫頁厲聲拒之仁宗時封
秦國公卒贈太師開府儀同三司上柱國佛琳忠獻王
子五人阿哩雅秦國公崇福使達罕翰林學士承旨哈
斯光祿卿奇爾濟蘇同知泉府院事老哈廣惠司提舉

庫庫

庫庫字子清本默爾奇斯氏部族世居布爾罕呼爾敦
地其俗驍勇善騎射諸族頗憚之國初舉族內附世祖

居潛邸選庫庫為近侍歲甲辰世祖聞王鶚賢避兵居保州遣使徵至問以治道命庫庫與廉希憲皆師事之既而庫庫出使于外迨還而鶚已行思慕號泣不食者累日世祖聞而異之歲庚戌憲宗復召鶚至和林仍命庫庫從之游每旦起盛飾其冠服鶚讓之曰聖王好賢樂善徵天下士命若從學若等不能稱主上心惟誇衒鮮華以益驕貴之氣恐窒于外而塞于中道義之言無自而入吾所不取也庫庫深自悔悟明日俱純素以進

鶚乃悅歲壬子奉命僉諸路軍籍以丁壯產多者充之所至編籍無撓人皆德之及還帝悅命領燕京匠局世祖即位特授中書左丞未幾遷大名路宣撫使以疾卒年四十子堅通字永叔少孤甫十歲即從王鶚游既長奉命入國學復從許衡遊弱冠入侍禁廷授中順大夫侍儀奉御遷中議大夫同修起居注及奉使濟南見楊桓賢遂力薦之至元二十三年授嘉議大夫禮部尚書遷吏部尚書秩未滿特授通議大夫御史臺侍御史二

十四年扈從東征屢戰有功遷燕南河北道提刑按察使二十八年授正議大夫燕南河北道肅政廉訪使遂拜河南行省平章政事驛召赴闕未拜以疾卒年三十九

圖古勒

圖古勒字親臣喀喇伊聶之孫雅爾達實第九子也自幼入侍世祖命與額森特穆爾博果密從許衡學帝一日問所學圖古勒與博古密對曰三代治平之法也帝

喜曰喀喇秀才朕初使汝往學不意汝即知此除蒙古
學士奉議大夫客省使進兵部郎中遷僉太史院嘗宴
見世祖屢開說古今治亂政要多所裨益至元二十年
遷中書右司郎中未幾大宗正色微肯薦掌其府判署
閱諸獄文案嘗暮歸愀然若有求而未獲者家人問之
曰今日所議死案也於我心有疑欲求所以活之未得
其方耳他日歸喜曰我得之矣於法當流徙邊地遷吏
部尚書時喀喇哈斯為湖廣平章嘗與圖古勒同在大

宗正素知其賢舉以自輔遂授資德大夫湖廣右丞時
湖南北盜賊乘舟縱橫劫掠哈喇哈斯患之圖古勒曰
樹茂鳥集樹伐則散戮一人足矣盜首喬大使者居九
江郡守伊拉瑪丹取賂蔽之遣使擒以來獄成殺而令
諸市羣盜頓息湖南宣慰張國紀創徵夏稅民弗堪圖
古勒屢請罷之至元二十九年辰州蠻叛副樞劉國傑
僉院蘇瑪拉往討之不利移文索辰澧沅民間弩士三
千哈喇哈斯以民弗習戰強之徒傷吾民弗許圖古勒

曰兵貴訓練乃可用也漢軍不習弩因蠻攻蠻古所利
遂與之果以此獲勝成宗即位遷江浙右丞適歲旱方
至而兩民心大悅未幾平章博果密卒帝思之問近侍
曰羣臣孰有似博果密者賀巴延對曰圖古勒其人也
且先帝所知遂驛召還賜雕鞍弓矢俄遷樞密副使大
德七年卒年四十八贈推忠翊亮佐理功臣榮祿大夫
江浙等處行中書省平章政事柱國大司徒趙國公諡
文肅子舒蘇仕至晉寧路總管

唐仁祖

唐仁祖字壽卿輝和爾人祖曰唐古直子孫因以唐為氏輝和爾舉國效順唐古直年十七給事太祖因屬之睿宗曰唐古直可任大事睿宗未及用莊聖皇后擢為扎爾古齊父驥豪爽好射獵世祖即位命驥為裕宗潛邸筆且齊陞達嚕噶齊仁祖少穎悟父沒母教之讀書通諸方語言尤邃音律中統初詔諸貴胄為質帝親閱之見仁祖曰是唐古直孫邪聰明無疑也俾習國字至

元六年中書省選充蒙古掾十六年錄囚平陽平反冤
滯免死者凡十七人十八年授翰林直學士時中書奏
真定保定兩路錢穀逋負屢歲不決遣仁祖往閱其牘
皆中統舊案亟還奏罷之轉工部侍郎除中書右司郎
中拜參議尚書省事時丞相僧格秉政威焰方熾仁祖
論議不回屢忤僧格人皆危之仁祖自若也遷工部尚
書僧格以曹務煩劇特重困之仁祖處之甚安尋出使
雲中僧格考工部織課稍緩怒曰誤國家歲用亟遣驛

騎追還就見僧格相府中遽命直吏拘往督工且促其期曰違期必致汝于法左右皆為之懼仁祖退召諸署長從容諭之曰丞相怒在我不在爾也汝等勿懼宜力加勉衆皆感激晝夜倍其功期未及而辦乃罷已而僧格繫獄有旨命仁祖往籍其家明日僧格以左右之援得釋衆見駭然目仁祖曰怒虎之威可再犯耶悉踰垣以竄仁祖獨不為之動僧格竟敗二十八年除翰林學士承旨中奉大夫遼陽饑奉旨偕近侍蘇克左丞實都

往賑實都欲如戶籍口數大小給之仁祖曰不可昔籍之小口今已大矣可偕以大口給之實都曰若要善名而陷我于惡邪仁祖笑曰吾二人善惡衆已的知豈至是而始要名哉我知為國恤民而已何卹爾言卒以大口給之俄除通奉大夫將作院使成宗即位尊大母元妃為皇太后以仁祖善書特勅書冊文復奉詔督工織絲像世祖御容越三年告成大德五年再授翰林學士承旨資善大夫知制誥兼修國史以疾卒年五十三贈

榮祿大夫平章政事追封洹國公諡文貞子恕初授奉
訓大夫壽武庫提點至大中遷翰林待制後累遷至亞
中大夫侍儀使

多爾濟

多爾濟字道明西夏寧州人父旺扎勒結世掌其國史
守西涼率父老以城降太祖命副賽音達呼為中興路
管民官國兵西征運餉不絕無毫髮私時號曰滿朝清
世祖即位旺扎勒結疾卒遣奏因高智耀以進請謹名

爵節財用帝嘉納焉多爾濟年十五通古注論語孟子

尚書帝以西夏子弟多俊逸欲試用之召見于香閣帝

曰朕聞儒者多嘉言多爾濟奏曰陛下聖明仁智奄有

四海唯當親君子遠小人爾自古帝王未有不以小人

而亡者惟陛下察焉帝曰朕于廷臣有戇直忠言未嘗

不悅而受之違忤者亦未嘗加罪蓋欲養忠直而退諛

佞也汝言甚合朕意因問欲何仕多爾濟對曰西夏營

田實占正軍儻有調用則又妨耕作土瘠野曠十未墾

一南軍屯聚以來子弟蕃息稍衆若以其成丁者別編入籍以實屯戶則地利多而兵有餘矣請為其總管以盡措畫帝可之乃授中興路新民總管至官錄其子弟之壯者墾田塞黃河九口開其三流凡三載賦額增倍就轉營田使秩滿入覲帝大悅陞潼州府尹時公府無祿田多爾濟乃以官曠地給民視秩分畝而薄其稅潼川仕者有祿自此始未幾臺臣奏為雲南廉訪副使時雲南諸蠻叛僚佐悉稱故而去多爾濟獨居守又八月

省臣大懼歸符印欲遁多爾濟乃白于梁王得檄而後
出遷山南廉訪副使未幾復調雲南廉訪使會行省丞
相特們德爾貪暴擅誅殺羅織安撫使布格呼丹將置
于極刑多爾濟謂之曰生殺之柄繫于天子汝以方面
之臣而專殺意將何為小民罹法且必審覆况朝廷之
臣耶布格呼丹竟獲免尋復其官棘夷與蠻相讐殺時
省臣受賄助其報仇乃詐奏蠻叛起兵殺良民多爾濟
奏劾竟廢之年六十二卒于官子仁通為雲南省理問

天曆二年三月雲南諸王與萬戶布呼等叛仁通率官軍討之没于陳

和尚

和尚約勒伯里巴約特氏祖哈喇徹爾率所部人歸太祖父古都斯齊力過人歲壬辰從睿宗破金大將哈達軍於鈞州三峯山以功賜號巴圖爾甲午金亡乙未授管軍百戶從攻宋唐鄧穎蔡襄陽郢復信陽光等州屢立戰功辛亥賜名馬文錦白金甲胄弓矢乙卯從攻漢

上鐵城寨歿于軍贈竭忠宣力功臣資德大夫中書右丞上護軍沅國公諡武愍和尚襲父職己未從世祖攻鄂州中統三年李璫叛從國兵討之戰老僧口斬獲甚衆陞阿嚩罕萬戶府經歷至元五年攻襄陽軍務繁劇贊畫皆有方都元帥阿珠薦其才可大用十一年從丞相巴延渡江與宋軍戰于柰子魯洑新灘沌口巴延上其功世祖嘉獎不已十三年從平章阿爾哈雅攻拔岳州取沙市至江陵宋安撫使高達城守拒戰和尚直抵

城下諭以禍福達遂開門出降以功陞行省郎中從國
兵圍潭州潭守臣李芾堅守攻之三月不下十二年城
破芾死諸將利於虜畧欲屠其城和尚宣言曰拒我師
者宋將耳其民何罪既受其降即是吾民殺之何忍且
今列城多未附降而殺之是堅其效死之心也左丞崔
斌曰郎中言是平章阿爾哈雅意亦與合遂從之一城
之人賴以全活由是湖南諸郡聞風皆下世祖聞之賞
賜加厚改行省斷事官徇地廣西督前軍攻破靜江遂

兼行宣撫事廣西平授太中大夫常德路達魯噶齊以
治最聞擢嶺南廣西道提刑按察使時阿爾哈雅恃功
頗驕恣和尚劾奏不少貸遷江南浙西道提刑按察使
浙西宋故都民衆事繁在職惟務鎮靜人服其知大體
卒於官年四十九贈宣忠守正功臣銀青榮祿大夫司
徒上柱國追封沅國公諡莊肅子齊諾齊諾以御史大
夫伊魯諾延薦入見大安閣世祖念其功臣子即以其
父官授之拜武德將軍江南浙西道提刑按察使時江

浙行中書省行御史臺皆治杭齊諾上言行省專控江
浙在杭為宜行臺總鎮江南不宜偏在杭且兩大府並
立勢偏則事窒情通則威褻盍移行臺於要便之所後
數年遂移行臺於江東遷山南湖北道提刑按察使二
十六年加明威將軍遷淮西江北道提刑按察使時僧
格秉政擅權勢焰熏灼人莫敢言齊諾乘間入朝見帝
於柳林極陳其罪狀帝為之改容未幾僧格伏誅又上
言其黨猶布中外宜早處分改立肅政廉訪司進廣威

將軍授江北淮東道肅政廉訪使三十一年遷江東建

康道肅政廉訪使丁祖母憂服闋東平大名諸路有諸

王牧馬草地與民田相間互相侵冒有司視強弱為予

奪連歲爭訟不能定乃命起齊諾治之其訟遂息大德

二年授大中大夫建康路總管未行奉詔使淮東西問

民疾苦察官吏能否齊諾勤於咨訪興利除害還奏軍

民便宜三十事多見採用歷江西湖東江南湖北兩道

廉訪使時中書平章巴延等固位日久黨與衆盛所任

之人徇情弄法網紀漸壞齊諾撫其實上于憲臺以聞
巴延等皆被黜前後七持憲節剛正不撓聞朝廷事有
不便必上章極論未嘗以內外為嫌七年授嘉議大夫
大都路總管兼大興府尹馭吏治民有方以暇日正街
衢表里巷國學興工尤盡其力俄進通議大夫同僉樞
密院事上疏言蒙古軍在山東河南者往戍甘肅跋涉
萬里裝索鞍馬之資皆其自辦每行必鬻田產甚則賣
妻子戍者未歸代者當發前後相仍困苦日甚今邊陲

無事而虛殫兵力誠為非計請以近甘肅之兵戍之而
山東河南前戍者官為出錢贖其田產妻子庶使少有
瘳也詔從之未幾遷參議中書省事贊決機務精練明
敏凡干祿之人由他道進者一切不用時論翕然稱焉
成宗崩迎仁宗于潛邸奉武宗即位危疑之際彌綸補
益之功為多拜榮祿大夫平章政事商議樞密院事左
翼萬戶府達魯噶齊提調屯田事賜玉帶延祐五年乞
致仕帝憫其衰老從其請仍給半俸終其身退居濮上

築先聖宴居祠堂於厯山之下聚書萬卷延名師教其鄉里子弟出私田百畝以給養之有司以聞賜額厯山書院家居七年而卒年七十一贈推忠輔治功臣光祿大夫河南江北等處行中書省平章政事上柱國追封衛國公諡景憲子倫布監察御史壽通洪澤屯萬戶早卒布呼齊南臺御史觀音保襲洪澤屯萬戶巴延呼圖克起進士知鄭州以治行第一入為翰林國史院經歷

劉容

劉容字仲寬其先西寧青海人高祖阿勒華西夏尚食
西夏平徙西寧民於雲京容父海川在徙中後遂為雲
京人容幼穎悟稍長喜讀書其俗素尚武容亦善騎射
然弗之好也中統初以國師薦入侍皇太子於東宮命
專掌庫藏每退直即詣國子祭酒許衡衡亦與進之至
元七年世祖駐蹕鎮海聞容知吏事召至命權中書省
掾事畢復前職以忠直稱十五年奉旨使江西撫慰新
附之民或勸其頗受送遺歸賂權貴人可立致榮寵容

曰剝民以自利吾心何安使還惟載書籍數車獻之皇
太子忌嫉者從而讒之由是稍踈容然容亦終不辯會
立詹事院容上言曰太子天下本苟不得端人正士左
右輔翼之使傾邪側媚之徒進必有損令德聞者是之
俄命為太子司議改祕書監未幾出為廣平路總管富
民有同姓爭財產者訟連年不決容至取籍考二人父
祖名字得其實立斷之爭者遂服皇子雲南王至汴其
達嚕噶齊某欲厚斂以通賄於王容請自往乃減其費

後以疾卒於官年五十二

嘉魯克鼐達實

嘉魯克鼐達實輝和爾人通天竺教及諸國語翰林學士承旨安藏扎雅爾達實薦於世祖召入朝命與國師講法國師西番人言語不通帝因命嘉魯克鼐達實從國師習其法及言與字期年皆通以輝和爾字譯西天西番經論進之帝命鈐板賜諸王大臣西南小國星噶爾德威二十餘種來朝嘉魯克鼐達實於帝前數奏其

表章諸國驚服朝議討暹國羅斛馬八兒俱藍蘇木都
刺諸國嘉魯克鼎達實奏此皆蕞爾國縱得之何益興
兵徒殘民命莫若遣使諭以禍福不服而攻未晚也帝
納之命巴爾瑪努斯特默等往使降者二十餘國至元
二十四年丞相僧格奏為翰林學士帝曰嘉魯克鼎達
實之官非汝所當奏也既而擢翰林學士承旨中奉大
夫遣侍成宗於潛邸且俾以節飲致戒成宗即位思其
忠遷榮祿大夫大司徒憐其老命乘車入殿仁宗即位

議汰冗官獨嘉魯克鼐達實為司徒如故仍加開府儀同三司賜玉鞍一是年八月卒

奇爾濟蘇

奇爾濟蘇蒙古阿齊台氏曾祖巴爾斯布哈從攻奈曼欽察俄羅斯滿濟勒噶回回諸國常為先鋒太祖嘉之賜虎符及諭降豐州雲州擢充宣撫使祖呼雅克和斯襲職佩虎符憲宗嘗語之曰汝所佩金符舊矣何以旌世功命改製以賜之中統三年改河中府達魯噶齊卒

父伊實摩擢襄陽統軍司經歷改宿州達嚕噶齊皆不
拜樞密副使博囉御史中丞茂巴爾引見世祖奏曰此
呼雅克和斯子乞以其祖父虎符授之擢中順大夫金
剛臺達嚕噶齊繼改光州屢遷安東州河中府及温州
潞州以建康路達嚕噶齊致仕奇爾濟蘇初以宿衛充
博囉齊至元二十五年擢朝列大夫司農少卿賜金束
帶遷中議大夫司農卿陞資善大夫司農卿拜榮祿大
夫行湖廣平章將兵討海南生黎諸峒寨又明年平之

師還徵入見賜玉束帶金銀幣帛弓矢甲冑及寶鈔鞍
勒得旨還鎮成宗即位入見賜海東青鶻白鶻各一及
衣服有差大德二年改福建行省平章未幾以福建隸
江浙改福建道宣慰使都元帥陞征東省平章政事高
麗刑政無節官冗民稀奇爾濟蘇因悉加裁正以聞有
旨徵入見俾條析便民事宜大德五年復拜湖廣平章
踰年改陝西以目疾還京師加官至金紫光祿大夫雲
南諸路行中書省左丞相卒年六十六子鄂勒哲湖廣

右丞征廣西賊卒於軍

蘇爾約蘇圖和琳

巴勒巴附

蘇爾約蘇圖和琳輝和爾人仕其國為烏嚕謬齊華言大臣也太祖時與其父來歸從征回回國事睿宗於潛邸真定睿宗分地以為本路斷事官子巴勒巴事世祖為博囉齊鷹房萬戶從征哈喇章有功賜男女各一人金一錠及銀甕等物征額呼布格戰於實默圖日三合殺獲甚衆賜金一錠後以鷹房萬戶從裕宗北征至北

哈尼嚕古賜銀椅及鈔一萬五千貫命歸守真定未幾
命行省揚州巴勒巴辭曰臣自幼未嘗去陛下願侍左
右改隆興府達嚕噶齊遥授中書右丞諭曰是朕舊所
居汝往居之巴勒巴又辭帝不允居三年海都叛奉旨
從噶瑪拉太子往征之師還以功賜金一錠卒贈銀青
光祿大夫司徒子阿里鷹房千戶實登安西王相府官
德服汝寧府達嚕噶齊阿薩爾甘肅行省平章政事琳
沁會同館使同知通政院有政蹟官至榮祿大夫中書

省平章政事兼翰林學士承旨通政院使卒子察納金
紫光祿大夫中書省平章政事察納子十人婁章知樞
密院事實默圖中書省參知政事

烏魯斯

烏魯斯喀喇氏曾祖哈斯巴延國初時款附為莊聖太
后宮牧官祖海都從憲宗征釣魚山歿於陣父莽賚特
穆爾世祖時為筆且齊後為太府少監烏魯斯至元十
九年為內府筆且齊二十一年拜監察御史遷雲南行

省理問領雲南王府事後以忤僧格被譖籍其家唯金玉帶各一黃金五十兩皆上所賜者乃以公用係官孳畜加之罪帝曰口腹之事其寢之二十六年置八番羅甸宣慰司進嘉議大夫宣慰使時諸蠻叛服不常烏魯斯平之乃立安撫等司以守焉二十八年平楊都要等九月進中奉大夫錫虎符明年為八番順元等處宣慰使都元帥賜三珠虎符大德六年授通奉大夫羅羅斯宣慰使兼管軍萬戶進正奉大夫武宗立召還授資善

大夫中書左丞領武衛親軍都指揮使大都屯田府事
尋進榮祿大夫中書右丞兼翰林國史承旨仍領武衛
屯田屢奉旨賜貲產第宅固辭遷四川行省平章政事
至大二年召還以瘴癘臥病不起皇慶二年卒年五十
有六贈光祿大夫益國公子博囉布哈初直宿衛為舒
庫爾齊至大元年為翰林侍講學士以父疾歸侍延祐
四年復入侍為舒庫爾齊扎薩繖至治元年為舒庫爾
齊五十人之長兼領皇后宮博囉齊二年襲授河南府

同知子察罕布哈領其所掌宿衛天厯元年見文宗於
汴入直宿衛為伊勒都齊拜監察御史遷御史臺經歷
中書右司郎中授中憲大夫隆禧總管府副達魯噶齊

多羅台

多羅台唐古氏祖蘇爾齊太祖定西夏括諸色人匠蘇
爾齊以業弓進賜名齊勤烏蘭為齊哩克昆行營弓匠
百戶從和林卒父塔爾古台襲職額呼布格叛塔爾古
台從戰蘇瑪勒圖之地死之多羅台從萬戶伊蘇岱爾

伊囉幹齊等累戰有功授前衛親軍百戶積官昭信校尉為陂屯田千戶所達嚕噶齊後以疾退多羅台之弟庫庫楚亦業弓嘗獻所造弓帝稱善問其父何名庫庫楚對曰塔爾古台臣之父也帝見其狀貌魁偉且問其能射乎左右對曰能試之果然遂命為近侍明年武備寺臣復以其弓獻且奏用之帝曰孔子言三綱五常人能自治而後能治人能齊家而後能治國汝可以此言諭之而後用之俄擢為大同路廣勝庫達嚕噶齊廣勝

者貯兵器之所時總管庫古哈雅以庫作公署寘甲仗於虛廩中多被蟲鼠之害庫庫楚言於帝復之且責其償兵器之既壞者使者色辰布哈納蘇羅丹以檄取鷹房軍衣甲弓矢若干庫庫楚責其入文書領去時憲副色埒默令毋入文書且命有司封鑰其庫將點視之庫庫楚不從事聞帝命咎色埒默罷之大德元年陞大同路武州達嚕噶齊兼管本州諸軍鄂囉勸農事又監建州利州改僉四川道廉訪司事拜監察御史累官中大

夫大寧路總管卒于官多羅台之子托歡初直宿衛歷御史臺譯史拜監察御史遷四川行省左右司員外郎四川廉訪司僉事樞密院都事陞斷事官其在四川時嘗上疏曰內外修寺雖支官錢而一椽一瓦皆勞民力百姓嗟怨感傷和氣宜且停罷仍減省供佛飯僧之費以紓國用如此則上應天心下合民志不求福而福自至矣回回戶計多富商大賈宜與軍民一體應役如此則賦役均矣為國以善為寶凡子女玉帛羽毛齒革珍

禽奇獸之類皆喪德喪志之具今後回回諸色人等不許齋寶中賣以虛國用違者罪而沒之如此則富商大賈無所施其奸偽而國用有畜積矣其辭懇直剴切當時稱之

額森布哈

額森布哈蒙古齊喇氏祖曰實喇阿古爾兄弟四人長曰圖卜布哈次曰齊哩克季曰哈喇阿古爾太祖微時齊哩克已深自結納後兄弟四人皆率部屬來歸太祖

以舊好遇之特異他族命為筆且齊長朝會燕饗使居
上列賓喇阿古爾早世其子博爾歡幼事睿宗入宿衛
憲宗即位與孟古薩勒密贊謀議拜中書右丞相遂專
國政賜真定之束鹿為其食邑至元元年以黨附額呼
布格論罪伏誅子四人長曰額森布哈次曰茂巴爾初
立御史臺為中丞次曰達實密累官至銀青榮祿大夫
次曰布哈特穆爾拜榮祿大夫四川省平章政事額森
布哈初世其職為筆且齊長裕宗封燕王世祖命額森

布哈為之傳且謂之曰額森布哈吾舊臣子孫端方明
信閑習典故爾每事問之必不使爾為不善也二十三
年拜上柱國光祿大夫雲南諸路行中書省平章政事
時阿郎可馬丁諸種焚夷為變討平之遂立登雲等路
府州縣六十餘所得戶二十餘萬官其酋長定其貢稅
邊境以寧大德二年遷湖廣行省平章為政不怒而威
不察而明大事集議衆論不齊徐決一言切中事理咸
出人意表會汴梁行省有妖獄飛語連湖廣平章政事

劉漢傑右丞燕公楠朝廷驛召二人者入二人與額森
布哈嘗有違言額森布哈急遣使附奏明其無他二人
皆得釋八年遷平章河南行省河決落黎堤勢甚危督
有司先士卒以備之汴以無患九年進拜上柱國銀青
榮祿大夫湖廣等處行中書省左丞相賞賜無虛月方
面以安至大二年卒天歷二年贈推忠守正佐運翊戴
功臣太師開府儀同三司上柱國恒陽王謚文貞子五
人曰額琳沁曰圖魯曰塔斯曰齊喇曰阿勒坦額琳沁

事裕宗於東宮為家令累拜銀青榮祿大夫湖南等處
行中書省左丞相延祐元年卒天厯元年贈推誠輔治
宣化保德功臣太傅開府儀同三司上柱國追封武昌
王諡忠定圖魯厯事四朝起家宗正府伊克扎爾古齊
拜開府儀同三司中書右丞相御史大夫太傅錄軍國
重事薨天厯二年贈懷忠秉義昭宣弼亮功臣太師開
府儀同三司上柱國追封廣陽王塔斯仕至資德大夫
湖南宣慰使齊喇仕至中政使阿勒坦事成宗襲長宿

衛有旨給七乘傳使往侍其父額森布哈于湖廣諸道
憲司以阿勒坦孝行聞拜中奉大夫海北海南道宣慰
使都元帥海康與安南占城接境海島生黎叛服不常
阿勒坦威望素著夷人帖服生黎王高等二十餘洞皆
願輸貢稅在鎮期年以省覲辭去至大二年拜資德大
夫中書右丞行浙東道宣慰使司都元帥未幾奔父喪
于武昌以哀毀致疾卒天歷二年贈秉義效忠著節佐
治功臣太保開府儀同三司上柱國追封特進趙國公

中書左丞相謚貞孝子阿榮由宿衛起家湖南道宣慰
副使歷拜奎章閣大學士榮祿大夫太禧宗禋院使都
典制神御殿事

元史卷一百三十四

元史卷一百三十四

額訥格爾傳侍母北行間闕鋒鎬中

按間字舊訛艱

今改

奇爾濟蘇傳陞資善大夫司農卿

按卿字舊訛即今

據文義改

欽定四庫全書薈要卷六千五百十四 史部

元史卷一百三十五

明翰林學士亞中大夫知制誥兼修國史宋濂等修

列傳第二十二

特爾格齊

特爾格齊高昌人世居五城後徙京師曾祖達實有謀畧為國人所信服太祖西征高昌國主懼以錦衣白貂帽召達實與謀達實知天命有歸勸其主執贄稱臣以

安其國由是號為尚書太祖班師諸王言於帝曰達實之子伊拉齊驍勇善戰所將部落又強大聞其人每思率衆効順而未有機便盍致之乎太祖是其議詔給驛馬五百迎與俱來既至引見甚器重之歲己卯太祖西征伊拉齊別從親王阿齊台與敵戰有功甚見親遇王方以絳蓋障日而坐及聞伊拉齊議事喜見顏色稱善久之既退撤其蓋送之十里遂得兼長四環衛之筆且齊壬辰從國兵討金以戰功最多賞賚優渥甲午副呼

圖克籍漢戶口籌其賦役分諸功臣以地人服其敏特爾格齊伊拉齊長子也尤沈鷺有才嘗有擁兵叛者特爾格齊率族人戰魚兒灤時軍興簿檄繁急特爾格齊以其國書識之無遺失者帝甚嘉焉至元中擢為棣州達魯噶齊遷德安府達魯噶齊適土人蔡知府以衆叛特爾格齊率衆先登冒矢石身被數創猶戰不已遂討平之主將怒將屠其城特爾格齊曰叛者蔡知府數人而已城中之人何預焉盍誅其黨與而止毋令濫及非

辜主將嘉其誠懇城遂得全累官至嘉議大夫婺州路達魯噶齊所在咸著政績大德己亥卒成宗勅其孫海壽載其柩歸葬京師贈榮祿大夫江淊行省平章政事柱國封榮國公諡簡肅子四人雅爾堅雅里幼給事裕宗宮至元十年為中書省宣使嘗使河南適汴鄭大疫雅爾堅雅里命所在村郭構室廬備藥醫以畜病者軍民全活者衆遷直省舍人承中書檄徵考上都儲待及還帝賜錦衣貂裘一襲以旌其能出為湖州路達魯噶

齊卒于官伊呀珠同知安陵府事巴扎同知宣政院事
孫九人海壽雅爾堅雅里子也由宿衛世祖朝累官太
中大夫杭州路達魯噶齊招復流民有恩惠卒贈翰林
直學士封范陽郡侯諡惠敏

達春

達春保喇之子也幼孤長善騎射至元元年入侍世祖
占對多稱旨賜以寶貨衣物四年給以察罕食邑賦稅
之半又還其所俘逋戶三十七年降金虎符授昭勇大

將軍山東統軍使鎮莒密膠沂郯邳宿即墨等城設方
畧謹斥堠宋人不敢北嚮九年詔更統軍司為行樞密
院改僉樞密院事數將兵攻下瀕淮堡柵畧地連海獲
人畜萬計宋人蔣德勝來降達春表言宜加賞賚以勸
來者於是賜黃金五十兩白金倍之十年改僉淮西等
處行樞密院事城正陽以扼淮海諸州兵宋陳奕率安
豐廣壽等州兵數撓其役達春選精銳日十數戰奕遁
去卒城正陽宋人復造戰艦於六安欲攻正陽達春詢

知之率騎兵焚其艦餽饟久不繼出兵據險潛取安豐
麥以餉軍宋兵壁橫河口達春將奇兵大破之十一年
朝議淮上諸郡宋之北藩城堅兵精攻之不可猝下徒
老我師宜先渡江翦其根本留兵淮甸絕其救援則長
江可乘虛而渡也於是以達春為鎮國上將軍淮西行
省參知政事帥師攻安豐廬壽等州俘生口萬餘來獻
賜蒲萄酒二壺仍以曹州官園為第宅給城南閒田為
牧地宋夏貴帥舟師十萬圍正陽決淮水灌城幾陷帝

遣達春往救之道出潁州遇宋兵攻潁戍卒僅數百人
盛暑達春即發公庫弓矢驅市人出戰預度潁之北關
攻易破乃急徙民入城伏兵以待是夜宋人果焚北關
火光屬天達春率衆從暗中射之天下如雨宋軍退走
至沙河大破之溺死者不可勝計明日長驅直走正陽
時方霖雨突圍入城遂堅壁不出俄復開霽與右丞安
塔哈分帥銳師以出渡淮至中流皆殊死戰宋軍大潰
追數十里斬首數千級奪戰艦五百餘艘遂解正陽之

圍達春乃上奏方事之殷宜明賞罰俾將士有所懲勸
帝納其言頒賞有差秋八月淮西行省復為行院達春
引兵渡淮屯廬揚間十二年從丞相巴延以舟師與宋
軍戰宋軍大潰其臣賈似道奔揚州遂分兵四出克池
州取太平順流東下至建康丹徒江陰常州皆望風迎
降時揚州未附諜告揚州人將夜襲丹徒守將乞援達
春設伏以待揚州軍果夜至達春扼西津邀擊之殺獲
溺死者甚衆入朝帝賜玉帶旌其功授淮東左副都元

帥仍佩金虎符十三年加通奉大夫參知政事領淮西
行中書省事時沿淮諸州新附達春禁侵掠撫瘡痍練
士卒備姦宄境內帖然俄遷江西都元帥征廣東達春
宣布恩信所至溪峒納款廣東遂平十四年加賜雙虎
符為江西宣慰使宋益王昞走保嶺海復改江
西宣慰司為行中書省遷治贛州授達春資政大夫中
書左丞行中書省事十五年以二王事入議帝命張弘
範李恒總兵進討達春留後以供軍費初江西甫定帝

命隳其城達春即表言豫章諸郡皆瀕江為城霖潦泛
溢無城必至墊溺隳之不便帝從之降附之初有謀叛
者既敗獲矣達春謂同僚曰撫治乖方之所致也中間
豈無詿誤止誅其渠魁盡釋餘黨瑞州張公明愬左丞
呂師夔謀為不軌達春廉知其誣曰狂夫欲脅求貨耳
若以矇昧言遽聞之朝廷則大獄滋興連及無辜且師
夔既居相職詎肯為狂妄之事若遲疑不決恐彼驚疑
反生異謀乃斬公明而後聞帝是之十七年入覲賜勞

有加復命行省于江西尋以疾卒於京師時年三十七
妻默呼氏以貞節稱旌其門閭二子長咱雅襲爵中奉
大夫江西宣慰使次賓咱雅仕至征東行中書省左丞
妻曰雅爾泰安郡武穆王博羅罕之女亦守義有賢行

塔喇齊

塔喇齊喀喇人也其父伊里布太祖時以武功授帳前
總校奉旨南征至洛陽得唐白樂天故址遂家焉塔喇
齊幼穎異好讀書尤善騎射襲父職參佐戎幕調度軍

馬動合事宜行省奏充斷事官時南北民戶主客良賤
雜揉蒙古軍牧馬草地互相占據命塔喇齊至其地理
之軍民各得其所由是世祖知其能俾領蒙古軍圍樊
襄塔喇齊躬冒矢石所向摧陷樊城破襄陽降從丞相
巴延渡江駐臨安尋命平章鄂囉齊等分為六路追襲
宋二王塔喇齊領軍至福建所過秋毫無犯降者如歸
宋都統陳宗榮率衆來降以功遷福建招討使時諸郡
盜起其最盛者陳吊眼擁衆五萬陷漳州行省承制命

塔喇齊為閩廣大都督征南都元帥總四省軍復漳州
生擒陳吊眼戮于市餘黨悉伏誅繼從征交趾擊敗黃
聖許等積功加鎮國上將軍三珠虎符廣西兩江道宣
慰使都元帥賀州盜起塔喇齊討平之改福建宣慰使
又改淞東金瘡發卒贈輔國上將軍淞東道宣慰使都
元帥護軍追封臨安郡公子二人托克托穆爾邵武汀
州新軍萬戶府達魯噶齊萬努廣西宣慰使都元帥

塔爾海特穆爾

塔爾海特穆爾塔塔爾岱人其先太祖時事國王穆呼
哩將左手大萬戶下蒙古軍領太原以西八州破金將
王公佐軍斬公佐從攻陝右征河西滅金皆有功賜種
田戶二百七十曾祖特穆爾克嗣從都元帥塔爾海甘
布征蜀卒於興元祖扎拉岱嗣扎喇岱卒父拜達勒尚
幼從祖扎里達珠相繼襲職扎里從都元帥達勒達征
蜀以所統軍二百人破宋軍于巴州斬首三百級生擒
五千餘人達珠以西川行樞密院檄領兵三千人救碭

門大敗宋軍斬首三百餘級俘百餘人以歸拜達勒既
長始以父官從行省伊蘇岱爾征建都死軍中塔爾海
特穆爾襲職初從行院呼敦圍嘉定嘉定降進圍重慶
守將張珏出迎敵塔爾海特穆爾力戰陷陣功最多十
年又以圖魯軍二百人破宋軍於白水江奪戰船一
俘其衆十三人陞宣武將軍管軍總管從伊蘇岱爾征
亦奚不薛又從征都掌蠻皆以為前鋒殺獲甚衆九溪
蠻散猫大盤蠻尚木的世用等叛從行省奇爾濟蘇帥

師往討皆擒之及殺其酋長頭狗等伊蘇岱爾雅爾哈
率兵萬人會雲南兵討烏蒙蠻至開竈其酋長阿蒙率
五百餘衆奔麻布蠻地塔爾海特穆爾以四百人追至
山箐大敗之擒阿蒙以歸二十六年又從伊蘇岱爾西
征不知所終

科爾結

科爾結阿蘇特氏憲宗時與父布達喇實直宿衛領阿
蘇軍二十戶世祖時科爾結以百戶從元帥阿珠伐宋

有功賜以白金等物宋平命充太宗正府伊克扎爾古
齊領阿蘇軍從征海都以功受上賞師還成宗命宣撫
湖廣等處訪求民瘼仍還舊職至大元年武宗命充左
衛阿蘇親軍都指揮使進階廣威將軍四年卒子特們
德爾由鄂德齊改百戶領阿蘇軍從指揮裕勒扎實征
納延卻金剛努軍于蘇布特齊之地降哈坦多羅干累
以功受賞至大四年襲父職授明威將軍阿蘇親軍都
指揮使子實沙事武宗仁宗直宿衛天厯元年九月兵

興從戰宜興擊殺敵兵七人自旦至暮卻敵兵凡二十
三處以功賜金帶一授左阿蘇衛都指揮使

呼圖克

呼圖克蒙古烏魯克台氏父巴罕事太祖備宿衛太宗
時為鎮西行省領蒙古漢軍從攻河中潼關河南與拜
濟蘇扎呼岱阿爾斯蘭攻秦鞏及仁和諸堡又守京兆
歲乙未授左手萬戶從都元帥塔爾海甘布出征辛軍
中憲宗命呼圖克將其軍從都元帥達勒達攻巴州又

從都元帥耨埒渡馬湖江破宋敘州兵於老君山下中
統元年宋以舟師二千犯成都新津呼圖克逆擊敗之
斬首百五十級至元元年授蒙古漢軍總管二年從都
元帥伯嘉努敗宋將夏貴於懷安五年卒子扎呼岱時
在宿衛弟呼爾敦達哩襲職呼爾敦達哩卒扎呼岱嗣
為千戶從行樞密院圍重慶重慶守張珏遣勁兵數千
挑戰扎呼岱力戰大破之回軍圍瀘州未下行樞密院
遣入朝計事授宣武將軍管軍總管復還攻瀘登城與

兵搏戰而死子阿都齊嗣

布爾噶蘇

布爾噶蘇托克托台氏世祖時直宿衛扈駕征哈喇章
還帝駐蹕高阜見河北有駕舟來者顧左右曰是賊也
柰何布爾噶蘇進曰臣請禦之解衣徑渡揮戈刺死舟
尾二人拏其舟就岸舟中之人倉皇失措帝命左右悉
擒之哈喇章平以功論賞子塔塔古爾從征伯克有功
由宿衛陞武德將軍齊齊克齊拉衮千戶所達魯噶齊

從征叛王納延額布根奮戈擊死數人擒額布根收其
所管欽察之民武宗時進懷遠大將軍元帥卒

伊勒濟呼濟哈雅

伊勒濟呼濟哈雅輝和爾人從憲宗征釣魚山奉命修
麴藥以療師疫賞白金五十兩繼從皇子蒙格圖征雲
南戰數勝中統三年呼圖克暨達哩叛領兵平之至元
十二年佩虎符為隴右河西道提刑按察使烏魯斯和
爾實雅謀亂從皇子安西王往鎮之皇子賜以白金五

十兩十五年與布色岱平圖魯皇子復賜金衣腰帶金
碗且以其功聞十七年進官嘉議大夫仍居舊職二十
年進中奉大夫四川等處行中書省參知政事尋以疾
歸秦州大德八年卒至順中贈推忠宣力定遠功臣資
善大夫陝西行省左丞護軍追封威寧郡公諡襄靖

明安

明安喀喇氏至元十三年世祖詔民之蕩析離居及僧
道漏籍諸色人不當差徭者萬餘人充桂齊令明安領

之明安歲扈駕出入克勤于事二十年授定遠大將軍
中衛親軍都指揮使明年賜佩虎符領桂齊軍北征又
明年立桂齊親軍都指揮使司命為本衛達魯噶齊尋
奉旨領蒙古軍八千北征明年至巴實伯里哈實之地
與海都軍戰有功二十六年冬十二月巴奇爾叛劫取
官站托克托和斯塔喇海等明安率眾追擊五戰五捷
悉還之至杭愛強民庫庫台錫里德克台等作亂奪三
站地劫托克托和斯明安又追擊却其軍二十七年秋

七月博索瑪當珊伯奇實克奇徹伯駙馬烏哲台多
羅台烏蘭岱爾塔哩雅齊等掠四集賽牛馬畜牧及劫
默呼太子實保齊并鄂拓克本布各投下民殆盡明安
將兵追擊于昂吉實保齊之城賊軍敗走還所掠之民
并獲其牛馬畜牧以歸時徹伯爾巴圖所領軍乏食奉
旨以明安所獲畜牧濟之二十九年以功陞定遠大將
軍桂齊親軍都指揮使司達嚕噶齊時巴實伯里哈實
盜起詔以兵討之戰于巴實伯里圖嚕古實有功賊軍

再合四千人於呼蘭烏遜明安與戰大敗之大德二年
復將兵北征與海都戰七年歿于軍子曰特爾格台曰
布呼齊特爾格台初為昭勇大將軍桂齊親軍都指揮
使司達嚕噶齊及改充萬戶以其叔托克托珠代之特
爾格台自萬戶改中衛親軍都指揮使進銀青榮祿大
夫平章政事子曰布延呼喇曰沙卜珠布延呼喇懷遠
大將軍桂齊親軍都指揮使司達嚕噶齊沙卜珠初直
宿衛歷中書直省舍人諸色人匠達嚕噶齊遷奉議大

夫僉中衛親軍都指揮使司事天歷元年九月賜佩一
珠虎符從丞相雅克特穆爾禦敵檀州等處又率其家
人諾海等十一人自出乘馬與敵軍戰却其軍俘八十
四人以歸丞相嘉之布呼齊昭武大將軍中衛親軍都
指揮使積官銀青榮祿大夫太尉子桑烏遜中衛親軍
都指揮使桑烏遜卒弟沁達罕襲職

呼魯蘇

呼魯蘇巴哩勒都氏曾祖博勒和罕北事太祖從平諸

國充巴勒喇實千戶以其軍與達實衮等戰重傷墜馬
帝親勒兵救之以功陞萬戶賜黃金五十兩白金五百
兩俾直宿衛祖蘇爾台年十五能馳射以勇畧稱從定
宗征欽察為千戶領兵下西番從世祖伐宋至亳州與
宋人迎敵敗之父昂吉爾岱初為軍器監官從世祖親
征額呼布格以功受上賞俄奉旨使西域籍地產悉得
其實帝方欲大用之而卒呼嚕蘇初直宿衛後以千戶
從征納延馳馬奮戈衝擊敵營矢下如雨身被三十三

創成宗親督左右出其鏃命醫療之以其功聞世祖以
克宋所得銀甕及金酒器等賜之命領太府監後以千
戶從皇子庫庫楚出征還留鎮軍中後從成宗與海都
都勒幹戰有功成宗嘉之特命為翰林承旨俄改萬戶
與叛王烏魯斯徹伯爾等戰以功授榮祿大夫司徒賜
銀印武宗嘗曰羣臣中能為國宣力如呼魯蘇者實鮮
其厚賚之於是遣使召見未幾武宗崩仁宗即位念其
舊勲賞賚特厚子雅克布琳初奉興聖太后旨充千戶

俄改充萬戶代父職尋罷歸其父所受司徒印及萬戶符於有司仍直宿衛致和元年秋八月在六都思武宗之恩與同志合謀奉迎文宗會同事者見執乃率其屬奔還大都特賜龍衣一襲命為通政院使天歷元年九月同丞相雅克特穆爾敗旺沁兵于紅橋又戰于白浮又戰于昌平東又戰于石槽帝嘉其功拜榮祿大夫知樞密院事以世祖常御金帶賜之

實喇巴圖爾

實喇巴圖爾阿蘇特氏父伊勒達穆憲宗時領阿蘇十人入覲充阿都齊從世祖至哈喇之地戰數勝烏蘭哈達以其功聞賜所俘人一口以賞之後以金瘡發卒實喇巴圖爾至自托博之地帝特賜白金楮幣牛馬等物至元二十一年從丞相巴延南征有功仍充阿都齊帝嘗命放海青白能獲新者賞之實喇巴圖爾即援弓射一兔二禽以獻賞沙魚皮雜帶及貂裘且命於尚乘寺為少卿於阿蘇為千戶二十四年授武畧將軍管阿蘇

軍千戶賜金符納延叛從諸王和約爾往征之力戰有功納延平帝賞以金腰帶及銀交牀等二十五年進武德將軍尚乘寺少卿兼阿蘇千戶征吉爾丹等敗之獲其駝馬等物成宗嘉其功以軍二千益之討叛王托克托禽之以功受賞大德六年卒子諾海齊襲職至大二年進宣武將軍右衛阿蘇親軍都指揮使賜二珠虎符泰定二年覃加明威將軍

徹爾

徹爾阿蘇特氏父拜哲伯憲宗時從攻釣魚山以功受
賞徹爾事世祖充和爾齊從征海都奮力擊其前鋒官
軍二人陷陳掖而出之以功受賞後從征杭愛獲其牛
馬畜牧悉以給軍食帝嘉之賞鈔三千五百錠仍以分
賚士卒成宗時盜據博囉塔拉之地命將兵討之獲三
千餘人誅其酋長還奉命同客省使巴圖爾等往巴喇
呼之地以前所獲人口畜牧悉給其主軍還帝特賜鈔
一百錠武宗居潛邸亦以銀酒器賞之至大二年立左

阿蘇衛授本衛僉事賜金符皇慶二年從湘寧王北征以功賜一珠虎符子實勒們直宿衛至和元年秋八月從知院托克托穆爾至潮河川獲諤勒哲巴圖爾阿達奇等十二人戮八人執四人歸京師復於宜興遇實喇奈瑪台等迎戰奮戈擊死二人賞白金楮幣天厯元年從擊圖們岱爾之兵於兩家店殺其四人復以功受賞從戰薊州又殺其四人十一月又追殺十二人于檀子山以功授左衛阿蘇親軍都指揮使司僉事

哈喇

哈喇烏蘇拉濟氏至元九年見世祖詔入太官直從討
叛王納延賜白金楮幣甲冑橐駝鞍馬以其才堪使遠
成宗時使高麗使和林使江西福建不失使指授忠勇
校尉中書直省舍人出監息州遷奉訓大夫武宗詔曰
哈喇世祖舊臣可授奉議大夫都水監卿明年加嘉議
大夫又明年佩金虎符兼直東碩達勒達女直萬戶府
達嚕噶齊延祐元年授資善大夫遼陽等處行中書省

左丞仍監其軍三年召還特授榮祿大夫大司農卒年六十三贈推誠宣力保德功臣太師開府儀同三司上柱國追封薊國公諡安穆子布哈宿衛仁宗潛邸及即位特授中順大夫中書直省舍人改客省副使遷太中大夫典瑞太監改左司員外郎參議中書省事拜中奉大夫中書參知政事資德大夫宣徽副使同知宣徽事改典瑞院事兼世其父監軍佩金虎符改翰林學士至治元年仍翰林學士監軍領東蕃諸部奏事

奇爾台

奇爾台察克台氏至元二十四年為欽察衛百戶從托克托呼征叛王錫里濟及納延有功賜金符陞千戶從征呼喇珠戰于阿勒台之地元貞二年卒子哈扎爾齊襲職從綽和爾於格噶勒之地與哈當阿戰有功大德五年從戰杭愛從武宗親征哈喇岱復從綽和爾征巴拜布琳為前鋒以功受賞皇慶二年授金符為千戶明宗居潛邸延祐四年命從西征與阿穆爾特穆爾戰于

實喇塔拉默色之地以功復受賞居其地十五年天曆二年賜金符授昭勇大將軍同知大都督府事卒

托音納爾

托音納爾塔塔喇氏世祖時從征納延以功受賞大德七年授欽察衛親軍千戶所達魯噶齊武德將軍賜金符八年改太僕少卿十年遷阿爾婁軍萬戶府達魯噶齊易金虎符進階懷遠大將軍尋改中奉大夫太僕少卿仍兼前職至大二年拜甘肅行尚書省參知政事通

奉大夫四年入為太僕卿陞正奉大夫皇慶元年授阿爾婁萬戶府襄陽漢軍達魯噶齊仍領太僕卿延祐三年拜資德大夫甘肅行中書右丞至治二年改通政使轉會福院使尋復通政致和元年分院上都秋八月為都爾蘇所殺文宗即位特贈宣力守義功臣榮祿大夫上柱國中書平章政事追封冀國公諡忠景有子曰鼎通濟爾噶朗鼎通襲父職阿爾婁萬戶府襄陽萬戶府漢軍達魯噶齊佩金虎符明威將軍濟爾噶朗初授欽

察親軍千戶所達魯噶齊佩金符武畧將軍改授朝列大夫通政院副使歷同知陞院使積官中奉大夫

和尚

和尚蒙古奈曼台氏祖海蘇充實勒們千戶所蒙古軍百戶伯父烏魯斯布哈初充蒙古軍五十戶至元七年從實勒們千戶南征以功權百戶從僉省阿薩爾哈雅攻樊城十一年從攻新城又從攻鄂東門攻處州屢立功二十五年賜銀符授敦武校尉後衛親軍百戶是年

秋卒父察爾奇襲察爾奇卒和尚襲至大三年進忠翊校尉後衛親軍副千戶賜金符延祐三年江西寧都寇起殺守土官吏從元帥奇珠等總兵討之生擒賊酋蔡五九誅之擣其巢穴致和元年八月西安王討都爾蘇命從丞相雅克特穆爾擒額卜德呼勒分兵備禦天厯元年九月從戰通州以功賞名馬從擊犯紅橋之兵手戈刺死二人敗之奪紅橋及納琳哲爾大夫等戰於白浮殺其四人和尚白丞相曰兩軍相戰當有辨今號纓

俱黑無辨我軍宜易以白丞相然之戰于昌平栗園殺
二人又與伊實特穆爾戰于石槽殺三人十月從擊圖
們岱爾於檀州南桑口敗之又從丞相追擊其軍于檀
州之北有功十一月命領八衛把總金鼓都鎮撫司事

元史卷一百三十五

元史卷一百三十五

特爾格齊傳曾祖父達實 按本傳內云達實之子伊里珠伊里珠長子特爾格齊是達實乃其祖父非曾祖也

特爾格齊傳歲己卯太祖西征 按己卯舊作丙午考聖武親征記及本紀太祖西征實在己卯年至丙午則在即位前二十餘年實無西征之事其為訛誤無疑今改

特爾格齊傳至元中擢棣州達嚕噶齊 按棣州舊訛

隸州據地理志改

達春傳鎮莒密膠沂郯邳宿等城 按邳字舊訛邳今

據地理志改

伊勒濟呼濟哈雅傳繼從皇子蒙格圖征雲南 按皇

子舊訛太子考世系表蒙格圖為太宗子庫敦之子

不得稱太子今據改

伊勒濟呼濟哈雅傳從皇子安西王往鎮之皇子賜以

白金五十兩 按皇子舊俱作皇太子考安西王實
非皇太子以下文皇子復賜金衣腰帶金碗云云覆
之則前書太子誤也今改

明安傳 按明安傳之前伊勒濟呼濟哈雅傳後原本
複出阿都齊一傳考阿都齊已附載一百三十二卷
內哈噶斯傳內與此相同今刪去此篇

徹爾傳奮力擊其前鋒 按力字舊訛不今改

欽定四庫全書薈要卷六千五百十五史部

元史卷一百三十六

明翰林學士亞中大夫知制誥兼修國史宋濂等修

列傳第二十三

哈喇哈斯

哈喇哈斯威喇諾爾氏曾祖奇爾實勒始事王汗托果琳王汗與太祖約為兄弟及太祖得衆陰忌之謀害太祖奇爾實勒潛以其謀來告太祖乃與二十餘人一夕

遁去諸部聞者多歸之還攻滅王汗併其衆擢奇爾實

勒為千戶賜號達爾罕從平河西西域諸國祖巴哩察

太宗時從太弟睿宗攻河南取汴蔡滅金賜順德以為

分邑父囊嘉特從憲宗伐蜀卒于軍哈喇哈斯威重不

妄言笑善騎射工國書又雅重儒術至元九年世祖錄

勲臣後命掌宿衛襲號達爾罕自是人稱達爾罕而不

名帝嘗諭之曰汝家勲載王府行且大用汝矣又語皇

太子曰達爾罕非常人比可善遇之十八年割欽廉二

州益其食邑二十二年拜大宗正用法平允審錄冤滯
所活數百人時相請以江南獄隸宗正哈喇哈斯曰江
南新附教令未孚且相去數千里欲遙制其刑獄得無
冤乎事遂止二十八年拜榮祿大夫湖廣行省平章政
事臺臣言其在宗正決獄平即去恐難其繼者帝曰湖
廣之地朕嘗駐蹕非斯人不可遂行時江湖間盜賊出
沒剽取商旅貨財哈喇哈斯至則發卒悉擒誅之水陸
之途始皆無梗初樞密置行院於各省分兵民為二奸

人植黨自蔽後因入覲極陳其不便帝為罷之因問曰
風憲之職人多言其撓吏治信乎對曰朝廷設此以糾
奸慝貪吏疾之妄為謗耳帝然其言三十年平章劉國
傑將兵征交趾哈喇哈斯戒將吏無擾民會有奪民魚
菜者杖其千戶軍中肅然俄有旨發湖湘富民萬家屯
田廣西以圖交趾哈喇哈斯密遣使奏曰往年遠征無
功瘡痍未復今又徙民瘴鄉必將怨叛吏莫知其奏抱
卷請署弗荅吏再請則曰姑緩之未幾使還報罷民皆

感悅及廣西元帥府請募南丹五千戶屯田事上行省
哈喇哈斯曰此土著之民誠為便之內足以實空地外
足以制交趾之寇可不煩士卒而饋餉有餘即命度地
立為五屯統以屯長給牛種農具與之湖南宣慰張國
紀建言欲按唐宋末徵民間夏稅哈喇哈斯曰亡國弊
政失寬大之意聖朝其可行耶奏止其議大德二年入
朝上都成宗拜光祿大夫江浙行省左丞相視政七日
徵拜中書左丞相進階銀青光祿大夫既拜命斥言利

之徒一以節用愛民為務有大政事必引儒臣雜議京師久闕孔子廟而國學寓他署乃奏建廟學選名儒為學官采近臣子弟入學又集羣議建南郊為一代定制五年同列有以雲南行省左丞劉深計倡議曰世祖以神武一海內功蓋萬世今上嗣大厯服未有武功以彰休烈西南夷有八百媳婦國未奉正朔請往征之哈喇哈斯曰山嶠小夷遼絕萬里可諭之使來不足以煩中國不聽竟發兵二萬命深將以往道出湖廣民疲於餽

餉及次順元深脅蛇節求金三千兩馬三千匹蛇節因民不堪舉兵圍深於窮谷首尾不能相援事聞遣平章劉國傑往援擒蛇節斬軍中然士卒存者纔十一二轉餉者亦如之訖無成功帝始悔不用其言會赦有司議釋深罪哈喇哈斯曰微名首釁喪師辱國非常罪比不誅無以謝天下奏誅之七年進中書右丞相嘗言治道必先守令近用多不得其人於是精加遴選定官吏職罪十二章及丁憂婚聘盜賊等制禁獻戶及山澤之利

每歲車駕幸上都哈刺哈斯必留守京師時帝弗豫制
出中宮羣邪黨附哈刺哈斯以身匡之天下晏然十年
加開府儀同三司監修國史置僚屬冬十一月帝寢疾
篤甚入侍醫藥出總宿衛藩王欲入侍疾者不聽日理
機務如故十一年春成宗崩時武宗撫軍北邊仁宗侍
太后在懷慶諸奸臣謀斷北道請成后垂簾聽政立安
西王阿南達哈刺哈斯密遣使北迎武宗南迎仁宗悉
收京城百司符印封府庫稱疾臥闕下內旨日數至並

不聽文書皆不署衆欲害之未敢發及仁宗至近郊衆猶未知也三月朔列牘請署后決以三月三日御殿聽政乃立署之衆大喜莫知所為明日迎仁宗入執左丞相阿固台及安西王阿南達等就誅內難悉平自冬至春未嘗一至家休沐夏五月武宗至自北即皇帝位拜太傅錄軍國重事仍總百揆賜宅一區以其子托歡入侍初仁宗之入也阿固台有勇力人莫敢近諸王圖喇實手縛之以功封越王三宮盡幸其第賜與甚厚以慶

元路為其食邑哈喇哈斯力爭之曰祖宗之制非親王
不得加一字之封圖喇疎屬豈得以一日之功廢萬世
之制哉帝不聽圖喇因譖於帝曰方安西王謀干大統
哈喇哈斯亦嘗署文書由是罷相出鎮北邊詔曰和林
為北邊重鎮今諸部降者又百餘萬非重臣不足以鎮
之念無以易哈喇哈斯者賜黃金三百兩白銀三千五
百兩鈔十五萬貫帛四萬端乳馬六十匹以太傅右丞
相行和林省事太后亦賜帛二百端鈔五萬貫至鎮斬

為盜者一人分遣使者賑降戶奏出鈔帛易牛羊以給之近水者教取魚食會大雪民無從得食命諸部置傳車相去各三百里凡十傳轉米數萬石以餉饑民不足則益以牛羊又度地置內倉積粟以待來者浚古渠溉田數千頃治青海屯田教部落雜耕其間歲得米二十餘萬北邊大治至大元年賜大帳如諸王諸藩禮十一月寢疾語其屬曰吾不復能佐理國事矣行省之務汝曹勉之母貽朝廷憂薨年五十二帝聞之驚悼曰喪我

賢相賻鈔二萬五千貫詔歸葬昌平追贈推誠履正佐
運功臣太師開府儀同三司上柱國追封順德王諡忠
獻子托歡由太子賓客拜御史中丞襲號達爾罕進御
史大夫行臺江南尋拜平章行省江浙進左丞相兼領
行宣政院重厚有父風喜讀書為政不尚苛暴得衆心
致和元年卒於官年三十七子滿滿

阿實克布哈

阿實克布哈喀喇國王族也初太祖拔喀喇時其祖母

臧密古瑪里氏新寡有二子曰庫魯克雅雅皆幼國亂
家破無所依欲去而歸朝廷念無以自達一夕有數駝
皆重負突入營中驅之不去旦乃繫駝營外置所負其
旁夜復納營中候有求者歸之如是十餘日終無求者
乃發視其裝皆西域重寶驚曰殆天欲資我而東耶不
然此豈吾所宜有遂驅馳載二子越數國至京師時太
祖已崩太宗立盡獻其所有帝深異之命有司治邸舍
具廩餼以居焉居二年聞國中已定謁帝欲歸帝曰汝

昔何為而來今何為而去且問其所欲對曰臣妾昔以國亂無主遠歸陛下今賴陛下威德聞國已定欲歸守墳墓耳妾惟二子雖愚無知願留事陛下帝大喜立召二子入宿衛而禮遣之後十三年復來則二子已從憲宗伐蜀矣逮至和寧聞憲宗崩諸將皆還而二子獨後心方以為憂過一古廟因入禱焉若聞神語連稱好好而不知其故問其國人通漢語者知為吉語還至舍則二子已至遂留居焉庫魯克無子雅雅後封康國王生

六子阿實克布哈最賢年十四入侍世祖世祖賜土田
奴隸使居興和之天城會西番遣使者有所奏請既諭
遣之後數日帝問近侍諸大臣曰前日西使何請朕何
辭以遣諸大臣莫能對阿實克布哈從傍代對甚詳帝
因怒諸大臣曰卿等任天下之重如此反不若一童子
耶嘗扈從上都方入朝宮草多露跣足而行帝御大安
閣望見之指以為侍臣戒一日故命諸門衛勿納阿實
克布哈阿實克布哈至諸門衛皆不納乃從水竇中入

帝問故以實對且曰臣一日不入侍身將何歸帝大悅更諭諸門衛聽其出入命飭四宿衛兵器無敢或慢復使掌門無敢闌入帝曰可用矣納延叛諸王諾延等皆應之帝問計將安出對曰臣愚以為莫若先撫安諸王乃行天討則叛者勢自孤矣帝曰善卿試為朕行之即北說諾延曰大王聞納延反耶曰聞之曰大王知納延已遣使自歸耶曰不知也曰聞大王等皆欲為納延外應今納延既自歸矣是獨大王與主上抗幸主上聖明

亦知非大王意置之不問然二三大臣不能無惑大王
何不往見上自陳為萬全計諾延悅許之於是諸王之
謀皆解阿實克布哈還報帝議親征命徵兵遼陽以千
戶帥實保齊之衆從行納延平阿實克布哈以大同興
和兩郡當車駕所經有帷臺嶺者數十里無居民請詔
有司作室嶺中徙邑民百戶居之割境內實保齊牧地
使耕種自養從之阿實克布哈既領實保齊帝復欲盡
徙興和桃山數十村之民以其地為實保齊牧地阿實

克布哈固請存三千戶給鷹食帝皆聽納民德之至今
飲食必祭至元十三年海都叛成宗以皇孫撫軍於北
阿實克布哈從踰金山戰杭愛有功成宗即位會大宗
正扎爾古齊都爾蘇以賊污聞詔鞠問之都爾蘇伏罪
就命代之成宗目之曰吹嘉勒吹嘉勒譯言閻羅王也
有訴朱清張瑄陰私既抵罪帝遣兵馬都指揮使呼喇珠
籍其家以受賂誅更命阿實克布哈往具以實聞賜宅
一區鈔萬五千緡兼兩城兵馬都指揮使事武宗時為

懷寧王總軍漠北問今日材可大用者為誰對曰母弟
托克托將相材無以易之遂命從行後果為名臣成宗
崩安西王阿南達乘間謀繼大統成后及丞相阿固台
諸王穆爾特穆爾皆陰為之助時武宗在北邊太后及
仁宗亦在懷孟未至適武宗遣托克托計事京師丞相
哈喇哈斯令急還報而成后已密諭通政使濟爾噶朗
止其驛馬阿實克布哈知事急與同知通政院事察納
謀作先日署文書給馬去濟爾噶朗聞托克托已去方

詰問吏閱案牘乃止太后及仁宗既至京師有言安西

王謀以三月三日偽賀仁宗千秋節因以舉事者阿實

克布哈言之哈喇哈斯曰先人者勝後人者敗后一垂

簾聽政我等皆受制於人矣不若先事而起哈喇哈斯

曰善乃前二日白仁宗詐稱武宗遣使召安西王計事

至即執送上都盡誅丞相阿固台以下諸姦臣與哈喇

哈斯皆居禁中仁宗以太子監國遣使迎武宗而武宗

遲迴不進遣使還報太后曰非阿實克布哈往不可乃

遣奉衣帽尚醢以往至野馬川見武宗備道兩宮意及

陳安西王謀變始末且言太子監國所以備他變以待

陛下臣萬死保其無他武宗大悅解衣衣之拜中書平

章政事軍國大事並聽裁決因奏平內難之有功者音

扎噶以下十人為兵馬指揮為直省舍人詔先奉蒲萄

酒及錦綺還報兩宮仁宗即日率羣臣出迎武宗入上

都加阿實克布哈特進太尉依前平章政事命與丞相

塔斯布哈還京師治安西王黨諸連坐囊嘉特章等三

十餘人皆釋之嘗命出太府金賜諸王貴戚及近侍方
出朝見一人倉皇若有所懼狀曰此必盜金者召詰之
果得黃金五十兩白金百兩以聞就以金賜之命誅盜
者辭曰盜誅固當金非臣所宜得願還金以贖盜死帝
悅而從之有近臣蹴踘帝前帝即命出鈔十五萬貫賜
之阿實克布哈頓首曰以蹴踘而受上賞則奇技淫巧
之人日進而賢者日退矣將如國家何臣死不敢奉詔
乃止帝嘗御五花殿丞相塔斯布哈三寶努中丞巴延

等待阿實克布哈見帝容色日悴乃進曰八珍之味不知御萬金之身不知愛此古人所戒也陛下不思祖宗倚託之重天下仰望之切而惟麴蘖是耽姬嬪是好是猶兩斧伐孤樹未有不顛仆者也且陛下之天下祖宗之天下也陛下之位祖宗之位也陛下縱不自愛如宗社何帝大悅曰非卿孰為朕言自今毋愛於言朕不忘也因命進酒阿實克布哈頓首謝曰臣方欲陛下節飲而反勸之是臣之言不信於陛下也臣不敢奉詔左右

皆賀帝得直臣遂進開府儀同三司中書右丞相行御史大夫俄復平章政事錄軍國重事兼廣武侍衛親軍都指揮使封康國公有以左道惑衆者諸世臣大家多信趨之竟寘于法遷知樞密院事以至大二年十月薨于位年四十七至正元年贈純誠一德正憲保大功臣開府儀同三司中書右丞相上柱國追封順寧王諡忠烈其繼室布古魯特氏有至行寡居三十年不妄言笑身不服華綵詔旌其門與元配塔刺海德濟氏並封順

寧王夫人子已扎納廉直剛敏憂國如憂家嘗為京尹
屯儲衛誘小民梅凍兒誣首海商一百十有六人為盜
而掠其貲獄具械送刑部命已扎納審錄之盡得其冤
狀白丞相釋之還其貲後遷翰林侍讀學士

拜珠

拜珠安圖孫也五歲而孤太夫人教養之稍長宏遠端
亮有祖風至大二年襲為宿衛長仁宗即位延祐二年
拜資善大夫太常禮儀院使四年進榮祿大夫大司徒

五年進金紫光祿大夫六年加開府儀同三司餘並如故每議大政必問曰合典故否同官有異見者曰大朝止說典故耶拜珠微笑曰公試言之國朝何事不依典故同官不能對太常事簡每退食必延儒士諮訪古今禮樂刑政治亂得失盡日不倦嘗曰人之仕宦隨所職司事皆可習至於學問有本施於事業此儒者之能事宰相之資也英宗在東宮問宿衛之臣於左右咸稱拜珠賢遣使召之欲與語拜珠謂使者曰嫌疑之際君子

所慎我長天子宿衛而與東宮私相往來我固得罪亦
豈太子福耶竟不往英宗登極拜中書平章政事會諸
侯王于大明殿詔進讀太祖金匱寶訓威儀整暇語音
明暢莫不注目竦聽夏五月宣徽使實勒們約蘇穆爾
妻伊埒扎巴等謀逆帝密得其事御穆清閣召拜珠謀
之對曰此輩擅權亂政久矣今猶不懲陰結黨與謀危
社稷宜速施天威以正祖宗法度帝動容曰此朕志也
命率衛士擒斬之其黨皆伏誅拜中書左丞相先時近

侍傳旨以姓名赴中書銓注者六七百員選曹為之壅

滯拜珠奏閣之注授一依選格次第吏無容姦刑曹事

有情可矜者寬恕之貪暴不法必不少容帝嘗諭左右

曰汝輩慎之苟陷國法我雖曲赦拜珠不汝恕也至治

元年春正月帝欲結綵樓於禁中元夕張燈設宴時居

先帝喪參議張養浩上疏拜珠謂當進諫即袖其疏入

奏帝悅而止仍賜養浩帛以旌直言三月從幸上都次

察汗諾爾帝以行宮亭麗殿制度卑隘欲更廣之奏曰

此地苦寒入夏始種粟黍陛下初登大寶不求民瘼而遽興大役以妨農務恐失民望從之帝嘗謂拜珠曰朕委卿以大任者以乃祖穆呼哩從太祖開拓土宇安圖相世祖克成善治也卿念祖宗令聞豈有不盡心者乎拜珠再拜曰陛下委臣以大任臣有所畏者三畏辱祖宗畏天下事大識見有所未盡畏年少不克負荷無以上報聖恩惟陛下垂閱時加訓飭幸甚延祐間朔漠大風雪羊馬駝畜盡死人民流散以子女鬻人為奴婢拜

珠以興王根本之地其民宜加賑卹請立宗仁衛總之
命縣官贖置衛中以遂生養至元十四年始建太廟于
大都至是四十年親享之禮未暇講肄拜珠奏曰古云
禮樂百年而後興郊廟祭享此其時矣帝悅曰朕能行
之預勅有司以親享太室儀注禮節一遵典故毋擅增
損冬十月始有事于太廟二年春正月孟享始備法駕
設黃麾大仗帝服通天冠絳紗袍出自崇天門拜珠攝
太尉以從帝見羽衛文物之美顧拜珠曰朕用卿言舉

行大禮亦卿所共喜也對曰陛下以帝王之道化成天下非獨臣之幸實四海蒼生所共慶也致齋大次行酌獻禮升降周旋儼若素習中外肅然明日還宮鼓吹交作萬姓聳觀百年廢典一旦復見有感泣者拜珠率百僚稱賀于大明殿執事之臣賜金帛有差又奏建太廟前殿議行袷禘配享等禮帝從容謂拜珠曰朕思天下之大非朕一人思慮所及汝為朕股肱毋忘規諫以輔朕之不逮拜珠頓首謝曰昔堯舜為君每事詢衆善則

舍已從人萬世稱聖桀紂為君拒諫自賢悅人從已好
近小人國滅而身不保民到於今稱為無道之主臣等
仰荷洪恩敢不竭忠以報然事言之則易行之則難惟
陛下力行臣等不言則臣之罪也帝嘉納之時右丞相
特們德爾貪濫譎險屢殺大臣鬻獄賣官廣立朋黨凡
不附已者必以事去之尤惡平章王毅右丞高昉因在
京諸倉糧儲失陷欲奏誅之拜珠密言於帝曰論道經
邦宰相事也以金穀細務責之可乎帝然之俱得不死

特們德爾復引叅知政事張思明為左丞以助已思明為
盡力忌拜珠方正每與其黨密謀中害之左右得其情
乘間以告且請備之拜珠曰我祖宗為國元勲世篤忠
貞百有餘年我今年少叨受寵愛益以此耳大臣協和
國之利也今以右相讐我我求報之非特吾二人之不
幸亦國家之不幸吾知盡吾心上不負君父下不負士
民而已死生禍福天實鑒之汝輩毋復言未幾奉旨往
立忠憲王碑于范陽特們德爾久稱疾聞拜珠行將出

蒞省事入朝至內門帝遣蘇蘇賜之酒且曰卿年老宜

自愛待新年入朝未晚遂怏怏而還然其黨猶布列朝

中事必稟於其家以拜珠故不得大肆其奸百計傾之

終不能遂在京倉漕管庫之職歲終例應注代時張思

明亦稱疾不出衆皆顧望拜珠雖朝夕帝前以事不可

緩乃日坐省中謂僚屬曰左丞病省事遂廢乎郎中李

處恭曰金穀之職須慎選擇不得其人未敢遽擬拜珠

曰汝為賣官之計耳遣人善慰思明乃出共畢銓事拜

珠每以學校政化大源似緩實急而主者不務盡心遂致廢弛請令內外官議拯治之有言佛教可治天下者帝問之對曰清淨寂滅自治可也若治天下捨仁義則綱常亂矣又嘗謂拜珠曰今亦有如唐魏徵之敢諫者乎對曰槃圓則水圓孟方則水方有太宗納諫之君則有魏徵敢諫之臣帝並善之六月壬寅敕賜平江腴田萬畝拜珠辭曰陛下命臣釐正庶務若先受賜田人其謂何帝曰汝勲舊子孫加以廉慎人或援例朕自諭之

秋七月奏召張思明詣上都數其罪杖而逐之特們德爾繼亦病卒拜珠哭之慟初浙民吳機以累代失業之田賣於司徒劉夔夔賂宣政使巴爾濟蘇買置諸寺以益僧廩矯詔出庫鈔六百五十萬貫酬其直田久為他人之業特們德爾父子及特克實等上下蒙蔽分受之為贓鉅萬真人蔡道泰以奸殺人獄已成特們德爾納其金令有司變其獄拜珠舉奏二事命臺察鞠之盡得其情以田歸主劉蔡巴爾濟蘇等皆坐死餘論罪有差

特赦特克實冬十二月進右丞相監修國史帝欲爵以三公懇辭遂不置左相獨任以政首薦張珪復平章政事召用致仕老臣優其祿秩議事中書不次用才唯恐少後日以進賢退不肖為重務患法制不一有司無所守秦詳定舊典以為通制帝幸五臺拜珠奏曰自古帝王得天下以得民心為本失其心則失天下錢穀民之膏血多取則民困而國危薄斂則民足而國安帝曰卿言甚善朕思之民為重君為輕國非民將何以為君今

理民之事卿等當熟慮而慎行之三年春二月將進仁宗實錄先一日詣翰林國史院聽讀首卷書大德十一年事不書左丞相哈喇哈斯定策功惟書越王圖剌勇決從容謂史官曰無左丞相雖百越王何益錄鷹犬之勞而畧發蹤指示之人可乎立命書之其他筆削未盡善者一一正之人皆服其識見夏六月拜珠以海運糧視世祖時頓增數倍今江南民力困極而京倉充滿奏請歲減二十萬石帝遂併特們德爾所增江淮糧免之

時特們德爾過惡日彰拜珠悉以奏聞帝悟奪其官仆
其碑奸黨特克實等懼帝在上都夜寐不寧命作佛事
拜珠以國用不足諫止之既而懼誅者復陰誘羣僧言
國當有厄非作佛事而大赦無以禳之拜珠叱曰爾輩
不過圖得金帛而已又欲庇有罪耶奸黨聞之益懼乃
生異謀晉王伊蘇特穆爾時鎮北邊特克實遣人至王
所告以逆謀約事成推王為帝王命囚之遣使赴上都
告變未至車駕南還次南坡特克實與齊勤特穆爾等

夜以阿蘇衛兵為外應殺拜珠遂弑帝於行幄晉王即位特克實等伏誅詔有司備儀衛百官者宿前導與拜珠畫像於海雲寺大作佛事觀者萬數無不歎惜泣下拜珠憂國忘家常直內庭知無不言太官以酒進則憂形于色有盜其家金器百餘兩他寶直鉅萬繼而獲盜得金家僮來告色無喜愠自延祐末水旱相仍民不聊生及拜珠入相振立紀綱修舉廢墜裁不急之務杜僥倖之門加惠兵民輕徭薄賦英宗倚之相與勵精圖治

時天下晏然國富民足遠夷有古未通中國者皆朝貢
請吏而奸臣畏之卒構禍難云母竒味氏年二十二寡
居守節初拜珠為太常禮儀院使年方二十吏就第請
署字適在後園閱羣戲出稍後母厲聲呵之曰官事不
治若爾所為豈大人事耶拜珠深自克責一日入內侍
宴英宗素知其不飲是日強以數卮既歸母戒之曰天
子試汝量故強汝飲汝當日益戒懼無酣于酒又嘗代
祀睿宗原廟歸侍左右母問之曰真定官府待汝若何

對曰所待甚重母曰彼以天子威靈汝先世勲德故耳
汝何有焉拜珠之賢母之教也後封東平王夫人泰定
初中書奏丞相拜珠盡忠效節殞于羣兇乞賜褒崇以
光後世制贈清忠一德功臣太師開府儀同三司上柱
國追封東平王諡忠獻至正初改至仁孚道一德佐運
功臣餘如故子都稜特穆爾

元史卷一百三十六

元史卷一百三十六考證

哈喇哈斯傳倣名首釁 按名字舊訛民今改

阿實克布哈傳丞相三寶努 按寶字舊訛實今據本

紀改

拜珠傳會諸王于大明殿 按于字舊訛子考元制無
王子之稱當為于字今改

拜珠傳帝嘉納之 按嘉字舊訛加今改

拜珠傳冬十二月進右丞相 按英宗本紀拜珠為右

丞相實在十月





總校官編修臣吳紹濬